

पुर्खा दयक तकगु सम्पत्ति, भीगु कला व संस्कृति
पिकाक-भक्तपुर नगरपालिका



स्वप नगरपालिका पार्खं
मोहनीया-मिन्तुना काल-बिल ज्या इवः

लान्चा फल्चा दांथाय् सांसद सुवाल जु निरीक्षणय्
(२०७८ असोज १२ गते)



दुब्यांकिगु फल्चा दांथाय् प्रमुख जु निरीक्षणय्
(२०७८ असोज १४ गते)





; DkfbSlo

@)* sllt\$!, c^a\$ &! , jif{#

न्यायपालिकां विश्वास ल्यंकः तय्गु ज्या याय्मः

सरकार निस्वांगु थ्यं मथ्यं स्वलालिपा पू बांकगु मन्त्रीमण्डलया छम्हा दुजः गजेन्द्र बहादुर हमालं सपथ कःगु पी घौ हे मरुनिबलय् राजिनामा बिला । प्रधान न्यायाधिश चोलेन्द्र शमशेर जवराया ससदाजु नाता याय्म्हा व नेपाली कांग्रेसया कोटां मन्त्रीख्य् दुतिंगु खःसां वयागु मन्त्री जुयगु योग्यता प्रधान न्यायाधिश नपांया नाता हे जूगुलिं खाँ प्याहाँ वगु खः।

न्यायपालिकां तः क हे विवादय् वैगु खाँ ज्या याडः च्वंगु बांलागु खाँ मखुः । न्यायपालिकाता जनताया आस्थाया केन्द्र काथं काई । प्रजातान्त्रिक देशय् नागरिकपिसं मेपिन्ता विश्वास मयासां न्यायपालिकां न्याय बिइ दक विश्वास याडः च्वनि । अथेन न्यायपालिकाया न्हापांगु पलां हे न्यायपालिकाया विश्वास नेपाली जनतां बुलुहुँ त्वः त हःगु खानय् दः।

स्वतन्त्र न्यायपालिका दक च्वयो तःगु खाँग्वलय् मखु जनतां व्यवहारय् क्यंगु स्वयगु मति याडः च्वंगु खः । अलय् न्यायाधिश ल्यइगु नं शासक दलं भागवण्डाय् लाकिगु, न्यायाधिशं सपथ काय धुकः दलया कार्यालय वाडः आशिर्वाद कः वानिगु परम्परां गथे न्यायालयं बिइगु न्याय्ख्य् निष्पक्ष जुइ दक आशा याय् फै ?

केपी ओलीं नेक तक प्रतिनिधिसभा विघटनयाता । सरकार प्रमुखया हैसियतं यागु व सिफारिसत सर्वोच्च अदालतं नेकतं बदर याडः बिला । नेपालया संविधान काथं कानुन व संविधानया ब्याख्या याय्गु अधिकार सर्वोच्च अदालतता जक दता । अदालतं ध्वामथूगु खाँ याता ध्वाथुइक बियगु व म काथं देश व जनताया भिं याइगु काथंया कानुनया ब्याख्या याइगु आशा याडः च्वनि । अलय् प्रतिनिधिसभा विघटनया मुद्दात स्वयबलय् नेका व माओवादीया नेता तय्गु बिचःया लिचवः लाक वहे काथं अमिता काथंछिंक ब्याख्या यागु खानय् दः ।

दुई तिहाइ कायो च्वम्हा सरकारं ताजा जनादेशया लागिं तःक हे निर्वाचन वानय् ताडानं अदालतं पाडः बिला । मखुसा अःतक ख्य् न्हँपुं जनप्रतिनिधिजु पिसं सरकार निस्वानय् धुकल ज्वी अलय् राजनीतिक स्थिरतापाख्य् दे हज्याइगु संकेत खानय् दैगु खः । सर्वोच्चया लिपाया फैसला प्याहाँ वय धुकः अपलं मनूतय्सं नेपः या न्यायालय् दुनयँ भारतीय गुप्तचर विभाग 'रअ' द्वहँ वाडः च्वंगु मति तःगु दः । नेप-या राजनीतिक अस्थिरतां फाइदा काइगु, मदिकक कुतः याडः च्वंगु व भारतीय जाशुसत न्यायालयनं द्वहँ वाडः च्वंगु दः, धाय्गु सिय दः ।

मन्त्रीमण्डल निस्वानय्गुलि प्रधान न्यायाधिशयाय् नं नां प्याहाँ वगुलिं सरकार विरुद्धया मुद्दाय् संविधानया अपब्याख्या याडः अदालतं हे प्रधान मन्त्री थुम्हा यो जक धःगु अलय् राष्ट्रपतिया नामय परमादेश जारी यागु खाँयाता कायो तःगु खः । थःगु स्वार्थया निंतिं देशता अस्थिरताख्य् ध्वाडः छ्वय्गु राज्यविरुद्धया घातक निर्णय खः । न्हा व लिपा अजगु निर्णय यापिन्ता छन्हू जनतां सजाय बिइतिति देउवा मन्त्रीमण्डलय् गजेन्द्र हमालया नियुक्ति 'गां तपुयो तःम्हा भौचा 'म्याउँ' हः थें जक खः । उकीं प्रधान न्यायाधिश हे दुथ्यागु खाँ प्याहाँ वसेलिं न्यायालयता याडः च्वंगु जन आस्था म्वाकः तय्ता दलया निर्देशनय् दलतय्गु निर्देशनय फैसला याडागु स्वीकार याडः व कुसीं प्यपुडः च्वनिपिन्ता व प्रधान न्यायाधिशता कार्वाही याय्गु निर्णय लिपा लाकय् मजिल । गुलि लिपालाक निर्णय याता, उलि हे न्यायालय व प्रधान न्यायाधिशया गरिमाख्य् घः लाइगु पक्का खः ।

पिकाक-ख्वप नगरपालिका/सम्पादक-आशाकुमार चिकंभञ्जार, डेस्कटप-धन लक्ष्मी त्यात, आवरण सज्जा-रेणु ध्वज्, थाकू- भक्तपुर अफसेट प्रिन्टर्स फोन ल्याः ०१-६६१३०४३, ई-मेल- khwopapau@gmail.com



का. रोहितया स्वकगु कोरिया भ्रमणया लुमन्ति

• का. रोहित

राजकीय भवय स्वयः

पीकगु विजय दिवसया लसताय राष्ट्रपति किम इलसङ्गं फुकक पार्टी, सरकार व संघ संस्थाया देशी व विदेशी प्रतिनिधिमण्डलपुं, दलया पाहापुं सःतः छगु राजकीय भोयया ग्वसः ग्वयो द्युगु खः ।

४:३० ताइलय जिपुं राष्ट्रपति भवनयुं थ्यन । आना जि व जीवनजी नेम्हा नेथायुं जू वान । प्रतिनिधिमण्डलया नेतात छगु तः क्वगु बैठकयुं सःतःतगु आना जिं तान्जानिया, धाना, लाओस, थाइल्याण्ड, पाकिस्तान, भियतनाम व मेगु देशया नेतात नपां परिचय याडा ।

बैठकयुं राष्ट्रपति किम इल सङ्ग राष्ट्रिय रक्षा कमिशनया नायो व कोरियाली जन सेनाया सुप्रिम कमाण्डर का. किम जोङ्ग इल व मेमेपुं नेतात द्रुहं भाल । सकलिं पाहांत थःथःगु थासं दाडः वयकपुं नपां लाहामिलयुं याडः म्हासिइका काकां, ब्यू ब्यू अलयुं अभिवादन काल बिल यात । का.किमइल सङ्ग नपां नपालाङ्गागु थ्व जिगु (का.रोहित) स्वकगु खः । अलयुं समाजवादया अजनं थप योजनाया नितिं वयकया भिं उसायुं व ताः आयुया कामना याडा । का.किम इल सङ्गं गम्भीर जुयो 'सुभाय' देछायो दिल ।

म्हासिइका पिब्वय धुकः फुकक प्रतिनिधि मण्डलया नेतात किपा काइथायुं दाँ वान । अलयुं राष्ट्रपति किम इल सङ्ग नपां किपा कायगु ज्या जुल । यूरोप व अफ्रिकाया तः तः द्विपुं व तः जन्तपुं पाहापिनि हनयुं जिपुं नेगु प्यंगु देया प्रतिनिधिमण्डलया मनूत आना हे तानि थें चवन ।

अलयुं पलखलिपा जिपुं राजकीय भवय नकिगु थासयुं द्रुहं वाडा । आना द्रुहं वाडा बलयुं राष्ट्रपति किम इल सङ्ग, मेपुं कोरियाली नेतात व विजय परेडयुं बवति कःपुं फुकक धायुं विदेशी प्रतिनिधि मण्डलया नेतातनं दः । लसकुस धुन नपां तस्कं न्हयलः न्हयलः लयतायो च्वंगु थासयुं वातावण नं मुसुकायो थ्वयो चवन ।

प्र.ज.ग. कोरियाया राष्ट्रिय रक्षा कमिशन व जनताया सशस्त्र सेनाया मन्त्री ओ जिनयुं जुं थःगु भाषण न्हयाकल - 'पितृभूमि युद्धखयुं कोरियाली जनता याः गुया हुनि प्रतिभाशाली



हानयबहम्हा नेता का. किमइल सङ्गया महान राजनैतिक व सैनिक नेतृत्व व त्याग खः । नपां साम्राज्यवादया आक्रमणया विरोधयुं पार्टी व नेताया प्यब्यरं क्वातुक छप्पा छधि जुयो ल्वापुं कोरियाली जनताया वीरतापूर्ण संघर्षया ज्वः मरुगु विजय खः ।

अथेनं अन्तर्राष्ट्रिय प्रतिक्रियावादी शक्तिपिनिगु पाखं मदिकक आक्रमण व क्वत्यलयुं (हस्तक्षेप) ज्या इवः याडं तुं वयो च्वंगु दः ।

भ्नीपुं जनतां समाजवाद निर्माण हज्याक यंकयुं व स्वतन्त्रता व देशया शान्तिपूर्ण एकीकरण (छप्पाछधि) या लागिं जुछे विचार धाराया ध्वायुं तलयुं च्वडः तस्कं-तस्कं थाकुगु युद्धखयुं क्यंगु अदम्य उत्साह व जोश ज्वडः मर्यासिं संघर्ष याडः वयो च्वंगु दः ।

'पार्टी व नेताया बांलागु लाँपु क्यनयुं फःगु विद्वतापूर्ण निर्देशनं न्यायोचित उद्देश्यया नितिं यागु भ्नीगु जनता व जनताया सेनाया संघर्ष न्हापायुं थें हे त्याइ तिति ।'

राष्ट्रपति किमइल सङ्गया ता हाकगु टेबुलयुं हे जिगु नं थायुं तयो तःगु खः । जीगु जव पाखयुं छम्हा यूरोपेली नेता च्वडदयुं खः सा देव पाखयुं छम्हा चिनिया सैनिक नेता दः । राष्ट्रपति जवय-खवयुं नरोदम सिहांनुक व यासेर अराफात च्वडः दयुं खः ।

भवय न्हयात । राष्ट्रपति किमइल सङ्गं टोष्ट प्रस्ताव तयो दिल । सकलें दाडः वयकया भिं उसायुं व कोरियाली



न्हयधगूगु स्वप पौ. बःछि पौ(पाक्षिक)

जनताया सफलताया कामना याता । धात्थें खय्क राष्ट्रपति किम इलसङ्ग अः नं भिं उसायँ दयो न्हिलासुं दांम्हा खानय् दः । भ्नाड-पानसया भिलिमिली व जःतिया चमत्कारं छायापियो हिसी दयो च्वंगु उगु तःहांगु थासय् १२० गू स्वयो अपः दे या पाहाँ त भ्नायो द्युगु खः । कोरियाली राजकीय भ्वयँ खय् मेगु देशया राजकीय भ्वयँखय् मदैगु छगू घासा (परिकार) खः दुर्लभ (चरा) पंछी क्वभांगया छ्यँ । टोष्ट प्रस्ताव तैगु इलय्या इन्सामत धात्थें पारखीपिनिगु लागिं पारखया खौं जुल । थयं मथयं च्याता इलय् भवय सिधल ।

मइया रङ्गशालाय् हायँपूगु संख्याकालय्

बहनिसिया ८:०० ताइलय् जुय धुंकल, सर्गया रूप व सर्गय् भ्याभाति हे हिलासु मवनि । ८:३० ताइलय् जिपुं (१ लाख ५० हजार) छगू लाख व डय्द मनु न्हयनिगु थाय् दय्कः तःगु मइ दिवश रंगशालाय् वाडा । राष्ट्रपति किमइल सङ्ग व मेमेगु देया विदेशी नेतात दबुली द्रहँ भ्नाय साथं रङ्गशालय् ध्वायँ व स्वम्ह्या लहर हे खानय् दत, छत्थुं हे लय्ता बः वयो रङ्गशाला थवतः ।

नेद्व मनु तय्सं पुचः म्यँ हालय् छिगु चाकहिलिगु दबुलीया



थयाक्क हःनय्या च्वसं च्वंगु भागया किमिल्सुनिगया व किमजोंगिलियाया स्वतय्गु टोकरिया किचा खानय्दत । व नपां नपां 'गौरब' अभिवादन', महाननेता किमइल सङ्ग-जिन्दावाद, व पितृभूमि मुक्ति युद्धया पीकगू दिवस जिन्दावाद या आखः नं खानय् दयो वल । नपां नपां (पटका) बार डाय्कः भुइचम्पा व आतसबाजी सुरु यात ।

बैण्ड बाजाया धुनय- 'जनतां नेताया म्यँ हाली' धाय्गु पुचः म्यँ हाल । अलय् द्रलंद्र मिसातय्सं प्याखं ल्हूल । थी थी काथंया स्लायत व मिखाहे पिइकिगु थें च्वंगुबिजुली या प्रविधिं क्यडः च्वंगु प्याखंत असाध्य हे स्वय हायँपुकः बांलाक क्यडः च्वना ।

मुक्ति युद्धय् मिसातय्गु ज्या (भूमिका), युद्धय् तोपता थःगु जिवं फयो शत्रुया चौकी कब्जा याइपिनिगु वीरतापूर्ण घटना शत्रुयागु हवाइ हमला व उकिया प्रतिकार लडाईया थी थी लू खं स्वकुमिपिन्ता तस्कं लय् ताय्कः च्वना । जितायां थःगु हःनय हे लडाई जुयो च्वंगु थें मति वान । मता जः व सः गुलि मिलय् जुइकः तःगु प्याखंम्वःत छ्यला, हुला प्याखं, सर्कस, कासा थी थी ब्वज्याखं उगु त्याकगू दिया सन्ध्या ई ता धात्थें हे सार्थक याड च्वना । उगु ब्वज्या स ८०,००० म्हा मिसा मचा-मिजंमचात, ल्यासे ल्याम्होपुं, जन सेनाया जवानपुं कलाकारत व कासाया कासामिपुसं ब्वति कःगु धायो च्वंगु जुल । म्यँ हालिपुं व प्याखं ल्हूइपिनिगु तिसा वस, तमासा क्यनिपिनिगु ज्वः लागु व सक्रियता, छज्वःलागु व छतिहे मद्रकसे मिलान याड क्यनय फःगु लिं सकल विदेशी पाहुनात अजु चायो भसुलांक भसुका तयो लाहापा थाइगु, गुम्हांगुम्हां थःगु सास हे छक दिक् लय् ताइगु । तस्कं लुमांकय् वहुगु उगु विजय दिवसया (नाचगान) प्याखं नं, म्यँ व काब्यं अङ्ग प्रत्यङ्ग त मिलय जुइकः सांकः क्यंगुलं पाहाँतय्सं थःता तांकः च्वनय्गु बाहेकं मेगु उपाय हे मरु । तस्कं हायँपूगु सांस्कृतिक ब्वज्या नपां आतसबाजी, बार डाय्कः भुइचम्पा ब्वय्कः यागु बढाईखं मन हे टोल्हय् जुइगु, मिखा हे तिरिमिरी जुइगु अलय् उत्सवया उगुथाय् दर्शकपुं थःता तांकः च्वन ।

विदेशी पाहुनापुं अजुचाय् पुगु भावं धायो च्वना ओहोः गपासिकं बांलागु, गज्जव ! कोरियाली जनता तस्कं मेहनती, अनुशासित व सिद्धहस्त खानय् दः फुक्क-फुक्क लागाय् ।

पीकगू विजय उत्सवया भिन्तुना

उपत्यका पाहाँ छँ थें बलय् बहनी मखु चा बाबु वानय् धुंकल । रंगशालाया तस्कं बांलागु लूत मनय् व नुगलय् म्हेतकः म्हेतकं जिपुं वाड च्वडा ।

माओवादीया नायो प्रचण्डं छाय् लगदिग मरुगु खाँ ल्ह जुइगु ?

● तिवेक

नेकपा माओवादीया नायो प्रचण्डं अः वयो तस्कं लगदिग मरुगु खाँ लहाड जूगु दः । वयागु खाँ न्यनय् बलय् व अः तस्कं तनाबय् च्वडः च्वंगु खाँ थुइकय् थाकु मजु । अपलं म्हवँ राजनैतिक दलया नेतातयसं थःगु कमजोरीता पिब्वइ मखु । अलय् प्रचण्डं पार्टी कार्यकर्तापिनिगु सहानुभूति काय्ता खः ला वा मेगु छुं करणं थःगु मनया खाँ पि ल्हवयो जूगु दः । वं गुब्लें (आत्महत्या) गः कियो सीय मः सि वगु, गुब्लें पार्टी हे विघटन यायगु व गुब्लें एमालेता क्वः मथः तलय् संगठन बलाइ मखुनि, दकः अराजनैतिक व मन क्वतुड वांगु निराशाजनक खाँ लहाडः च्वना ।

माओवादी तयसं थः ता कम्युनिष्ट पार्टी दक दाबी याडः वयो च्वना । धात्थें कम्युनिष्ट खःगु जुसा थःपुं कार्यकर्तापिन्ता पुँजीवादया थाव्वा क्वबवाया बारे व देशय् समाजवाद महसँ मगादक प्रचार-प्रसार याय मःगु मखुला ? सरकारे वापुं व थी थी लागाय् पहुँच दय्क च्वंगु ल्याखं अजपुं नेता तयसं नुवागु खाँ खं अपलं लिचव लाइगु खाँ थुइकय् मः अलय् दुःखया खाँ छु लय् धःसा माओवादीया थी थी सभा सम्मेलनय् वा ज्या इवःखय् प्रचण्डया अभिव्यक्ति के.पि. ओलीया ब्यक्तिगत द्वपं वियगु, कुं खिय गुलि जक इ फुक च्वनि । बिचः व सिद्धान्तं चुलुयो वापुं नेतातय्गु अवस्था थुइकेता अः प्रचण्डया लिपाया खाँ जक न्यनयवं कु गा ।

आखिर प्रचण्ड थुगु अवस्थायय् छाय् थ्यना ? थुकी या बारे छक दुवालः स्वय

१) अहंकार (जि हे खः धाइगु)ः हिदातक सशस्त्र संघर्ष याडः सरकारय् थ्यंगुया जि हे खः धाय्गु अहम भावनां ज्वडः २०६३ सालय् पुनः स्थापित संसदय् एमाले याक्वति ८३ गू सिटय् सांसद त्याकालीं संसदय् द्रहँ व बलय् वयागु फायफूर्ति हे विस्कं पहया खानय् दः । वया कार्यकर्तातयसं मेगु संसदय् दःपुं मेगु कम्युनिष्ट पार्टीतय्ता क्यडः धाइगु - 'सेना मरुगु पार्टी कम्युनिष्ट पार्टी जुय हे फैमखु ।' उब्ले अमिपुं लडाकुत शिविरय् च्वडः च्वंगु खः । वहे लडाकु पिनिगु भरय् २०६४ सालया संविधान सभाया निर्वाचनय् प्रत्यक्ष पाखय् थ्यं मथ्यं बहुमत त्याकसां लडाकुत राज्यता लः लहाय् धुडानीं नं माओवादीया नायो कय् न्हपायाय्गु फूर्ति म्हवँ मजु । वहे अहंकार व दम्भखं हे अः व अथेथथे मरुम्हा जुगु खै ।

२) पार्टी ल्यंक तय्गु चिन्ताः सशस्त्रसंघर्षया इलय् प्रचण्डता साथ विइपुं मू मू ग्वाहालीमित अः उखय् थुखय् मदय्क लात । बाबुराम 'नयाँ पार्टी' जू जुं अः जसपाया नेता जू वान । वयाम्हा पश्चिमाञ्चल कमाण्डर लेखराज भट्ट के.पी ओली नपां मिलय् जू वान । तराइया नेता धायो तः म्हा, तः क हे मन्त्री याय् धुंकम्हा प्रभु शाहं वाता त्वःत वान । टोप बहादुर रायमाभी नपांया मेपुं व

नपां मदय् धुंकल । वयाम्हा सैन्य कमाण्डर वादल नं एमालेपाखय् वांसेलिं कार्यकर्तापिनि दथवी - 'पार्टी मेपिन्ता हे लः लहाडः साफू च्वः वानय् मःसिं व अथेनं ग्व ? अहं' दक पार्टीया जिम्मा कायफःपुं माओवादीखय् सुं हे मरुथें च्वंक धाला । वयागु खाँ खं व याकचा जूगु अनुभव प्वंक च्वना धाय्गु बांलाक हे सिय दः ।

३) चुनावय् बुइ दक ग्यागुः पुँजीवादी ब्यवस्थाय् धेबा, गुण्डा व प्रसाशनया भरय् चुनाव त्याकय्गु याई । २०६४ सालया निर्वाचनय् माओवादीं साम, दाम, दण्ड, भेद नीति कः घाडः चुनावय् त्याकगु खः । महाद्यो सदां जः पाय् लाड च्वनिमखु' दक धाई । लिपाया चुनावय् माओवादी याकचां चुनाव त्याकय् मफैगु खानय् दयानिं २०७४ सालया स्थानीय निर्वाचनय् एमालेता बुकय्ता नेपाली कांग्रेस नपां मिलय् जूयो, चुनाव ल्वाता धःसा संघ व प्रदेशया चुनावय् नेकांता बुकय्ता एमाले नपां मिलय् जुयो चुनाव ल्वाता । प्रचण्डया अवसरवादी नीति थ्व नेगु चुनाव हे छताछुल्ल जुला । वं पार्टी बिचः व सिद्धान्तया लिधांसाय् न्हयाकय्गु स्वयो जालभेल, जःजि व भांगः लाड जूसां चुनावय् त्याकय्गु नीति काला । चुनाव त्याकय्ता नेकां व एमाले थजगु पार्टीपिन्ता नपां ल्वपा नकय्गु काथं धेबा ह्वला । थःगु क्वतुड वाडः च्वंगु 'इज्जत' ल्यंक तय्ता एमाले नपां पार्टी हे स्वाडः छ्वता । अलय् अः पार्टी तज्याय् धुंकः अः गथे याकचा चुनावय् ल्वाय्गु धाय्गु चिन्ता वयागु मनयें बांलाकः खानय् दः । छाय् धःसा अः खुला लिपा स्थानीय निर्वाचन जुइगु जुल । उगु चुनावय् बुइगु खाडः हे व बिष्णु ज्वरय् हः म्हा थें हाल हःगु खानय् दः ।

४) आर्थिक संकटः 'स्यालय् तिइगु' भूगु समाजय् माओवादीता पुँजीपति वर्ग नं बुलुहँ त्वःत हः सेलिं अपुं महाद्योवं त्वः तम्हा द्रहँसाथें जुयो च्वंगु दः । के.पि ओली प्रधानमन्त्री जुगु इलय् सलंस उद्योगपति एमालेखय् दुकाय् धुंकल । प्रचण्ड कमजोर जुयो वानय् धुंकानिं ब्यापारीतयसं माओवादीता छु जक तेरे याड च्वनि । ब्यापारीत लबः या निंतिं ज्या सानिपुं खः । अपुं थः ता जक फाइदा जूइगु जूसा न्हयागु नं पार्टी द्रहँ वानि । न्हपाथें तुं अः माओवादीतय्ता ब्यापारी तयसं ग्वाहाली याइ मखु । थुकिं माओवादीतय्के न्हपा स्वयो अः अपलं आर्थिक स्रोत गाडः वानिगु सिय दः । न्हपा माओवादी लडाकुया नामय बीसौ अर्ब तका दां राज्यया सम्पति लुटेयाडः काल, सशस्त्र संघर्षया इलय् बैंक व तः तः हांपुं घरानिया पिंगु लुटेयाडः कःगु अबौया सम्पति दःगुलिं मेगु पार्टीता फूर्ति क्यनय् फःगु खः । अकिं हे जुइ प्रचण्डजीं - अ याय्गु चुनावय् गाउँपालिकाय् त्याकय्ता जक बीसौ लाख, संघ-प्रदेशय् त्याकय्ता करोडौं तका दां मः भूी थजपिसं गथे चुनाव त्याकय् फै ? दक निराशा



न्हयधगूगु स्वप पौ. बःछि पौ(पाक्षिक)

पूर्ण अभिव्यक्ति बिला । श्व वं चुनाव हॉ हे थमनं ब्रुतः धाय्गु स्वीकार यागु काथं थुइकय् फः ।

५) बेपत्ता घाइटे परिवार व अयोग्य लडाकुपिनिगु दवाव माओवादी सरकारया दशवी सशस्त्र द्वन्द्वया इलय् द्वलं द्व बेपत्ता व घाइटे जूगु खः । माओवादी २०६३ सालनिसैं अतः क हे सरकारय् वान, अथेनं अः तक वेपत्ता व घाइटे परिवार पिनिगु मागया खॉ न्हि हे मथां । तः कः हे बेपत्ता छानविन आयोगया म्याद तानय्गु ज्या जुल अथेनं छुं नं खॉ थथे हे जक क्वः छिय फःगु मरु । अजपुं परिवारत माओवादी नपां असन्तुष्ट जक मखु तस्कं तंपिकायो च्वंगु दः । गुलिं घाइटे पिसं थःगु म्हाय् लागु गोली क्यें क्यें माओवादी नेतातय्गु विरुद्धय् चर्को चर्को नारा श्वयक च्वंगु दः । अमिसं म्हवचाख्य नय त्वनय्या व्यवस्थातक जूसां याड बिया दक माग याड च्वंगु दः । व घाइटे वेपत्ता व सहिद परिवारया हिया मूल्यख्य जङ्गल्य च्वंपुं नेतात थौं अरबौया महलय् च्वडः च्वंगु खाडः- नेतात गाम्य जक वा अमिता लितु लिडः पितिड छ्वयो ह्य' धायो च्वंगु दः । बाबुराम व मेमेपुं नेतात माओवादी त्वः त वांसेलिं अपुं फुककसिया दवाव अःप्रचण्डता लाड च्वंगु दः । उकिया व्यवस्थापन याय्गु उपाय् व यागु दिमाग्य वगु खानय् मरु ।

६) सशस्त्र युद्धकालीन मुद्दाः माओवादी नेतातय्गु नामय् देशया थी थी अदालतय् अपलं फौजदारी मुद्दात विचाराधिन अवस्थाय् दः । मानव अधिकारवादी गुलिसिनं प्रचण्ड, बाबुराम पिन्ता कार्बाहीयाय् मः दक अन्तर्राष्ट्रिय मानव अधिकार संस्थाय् उजुरी दर्ता याड तःगु दः । थथे हे माओवादीत कमजोर जूयो वान धःसा छुं नं इलय् माओवादी नेता तय्ता अन्तर्राष्ट्रिय अदालतय् लुयो यंकय् फः । शेरबहादुरदेउवा हे खः, गुम्हासिं -'प्रचण्ड-बाबुराम या कप धयडः न्हिँ भोलाय् दांक धेबा ज्वडः हूँ' दक घोषणा यागु । छुं नं इलय् व अवस्था वयफः दक प्रचण्ड चिन्ता कायो च्वंगु छगू कारण श्वनं जुयफः ।

७) के.पी ओली पाखं धोकाः - के.पी. ओली सुरुनिसैं माओवादीया बांमलाक कुं खिइम्हा मध्ये खः । २०७४ सालया स्थानीय निर्वाचनया इलय तक ओलीया बोली माओवादीयाय् खायं छतिं हे मपा । माओवादी गुब्ले नकां नपां मिलय् जुयो स्थानीय चुनावय् ल्वाय्गु खॉ क्वः छिता उब्लेनिसैं ओली माओवादीता धाइगु बोली पाडः वल । संघ व प्रदेशया चुनावय् नकां निसैं त्वः तक माओवादी निसैं मंकः घोषणा-पत्र ज्वडः चुनावय् ल्वाय्गु व पार्टी छगू याय्गुतक खय् थ्यंकला । एमाले व माओवादी छप्पा याय्गु एमालेता माल च्वंगु खःसा माओवादीतय्गु बाध्यता । माओवादी याकचा चुनावय् ल्वाडः त्याकय् फैगु थाय् छथाय् - नेथाय् जक दता । अलय् उब्लय् माओवादीया नायो प्रचण्ड छप्पा जुयगुया नामय एमालेया नेता जुयगु म्हागस खांक च्वम्हा खः सा केपी ओली एमालेखय् माओवादी स्वाडछ्वयो फुकक थःगु याय्गु विचलय् च्वना । पिनय् न्हयागु हे प्रचार याड जूसां नेम्हां नेतातय्

थः थः गु स्वार्थ दःपुं खः । प्रचण्ड एमालेया नेता जुयता एमाले तछ्याय् मःम्हा खः । वहे हुनिं सुरुनिसैं प्रचण्डं माधव नेपाल नपां मिलय् जुयो एमाले दुनय बिस्कं गुट दय्कला अलय ओलीता याकचा याय्गु कुतः याता । थुकी प्रचण्ड छुं भाति सफल नं जुला । अलय् के पी ओली थें राजनीतिक चतुर ब्यक्ति नपां गुगुमतिं प्रचण्डं ज्या यागु खः अथे मजुसैं वहे कारणं वं तहांगु फल फय् माला । अथेधाय् ओली एमालेता बचय् याय्ता प्रचण्डता धोका बिला ।

८) नेका (एस) नपां चुनावी मोर्चा ? मेपिनिगु पार्टी तछ्याडः जुइम्हा प्रचण्ड माओवादी नं क्वचा क्वचा थै धाय्गु मति मतः न्ह्याथय् याडः जुसां केपी ओलीता लिकायो माधव नेपाल नपां मिलय् जुयो एमाले लाकः काय्गु वयागु दुनय याय्गु स्वार्थ अदालतया फैसलाया कारणं पू मवान । सर्वोच्च अदालतं एमाले व माओवादीता एकता अवैध घोषणा याडः नेगु बिस्कं पार्टी दय्क ब्यूसेलिं प्रचण्ड व माधव नेपालया पार्टी केन्द्र निसैं स्थानीयतक थःगु संगठनात्मक स्थिति गजगु दय्किगु खः स्वयबाकी दःनि । अः माधव नेपालं विस्कं पार्टी दर्ता यासां कार्यकर्तात धःसा एमाले पाखय् हे वांगु खानय् दः । चुनावय् माओवादीं अः याय्गु गठबन्धन ल्यंक चुनावय् ल्वाय्गु बिचः तःसां नेका संकः च्वडः च्वना । कांग्रेस एमाले माओवादी तज्यागुलि हे फाइदा काय्गु दाउ स्वयो च्वना । प्रचण्डया कपः स्यागु छगू कारण श्वनं जुयफः ।

९) अपराध बोधया भावना : अपराधं पोलय् जूपुं मनूतय् न्हयो वै मखु । व चान्हय् नं न्हयलय् हाल है । अपलं अपराधीत अथे याड नं लुइकी । प्रचण्ड जिं सार्वजनिक ज्या इवलय् हे हिं न्हयद्वमनू सीगुलिं डाढ मनु स्यागुयाय् जिम्मा जिं काय् धःगु हे खः । श्व प्रचण्डया साविती बयान खः । अन्तर्राष्ट्रिय अदालतय् मुद्दा यागु जूसा उकिता महत्वपूर्ण प्रमाण काथं काय् फः । सशस्त्र संघर्षया इलय गुलिनं नागरिकपिन्ता क्रुरतापूर्वक स्यागु भिडियो त पिताय् हयो च्वंगु दः । उगु अपराधया कारणं नं अः प्रचण्ड जिया खॉ थातय् मलागु खः ला ?

धात्थें अः प्रचण्डजी नपां पुलांपुं नेतात नपां मरु । ल्वाभः नपां दःपुं लडाकु त नं मरु । चन्दा विद्वपुं पुँजीवादी तय्सं त्वः तलज्वी, अन्तर्राष्ट्रिय शक्ति नं न्हपाय्थें ग्वाहाली मया ज्वी । थजगु फुकक परिस्थितिं याडः पार्टी न्हयाकय् फैगु स्थितिमखांसेलिं च्वय धः थें खॉ क्वःछ्यगु ज्वी धाय्गु वयागु खॉ खं धाय् फः । पुँजीवादी पार्टीत मिलय् जुयो वाय्गु धर्वा, लुसी फुकक श्वकय् धुकल । प्रचण्डकय् म्हुतु छक्व बाहेक मेगु छुं नं याय्गु शक्ति अः मदय् धुकल । वयाके न भौतिक शक्ति दः न नैतिक शक्ति हे ल्यं दः नि । अजगु इलय् व हां डाम्हा थें मजुइगु गथे ? अः अजपुं नेतात पाखं जनतां छु आशा याय्गु ? अः सरकारय् दः सां पुँजीपति वर्ग व थःपुं कार्यकर्तापिन्ता प्वाथानय्गु बाहेकं जनताया भिं ज्या छुंनं याय् फे मखु ।



ब्हयध्वगुगु स्वप पौ. बःध्व पौ(पाक्षिक)

ख्वप नगरपालिका वडा नं. ६ सं निर्माण ज्याइवः व ऐतिहासिकता

● वडाध्यक्ष ६ हरिराम सुवाल

ख्वप नगरपालिकाया उत्तरपूर्व क्षेत्रय् थुगु ६ नं. वडा ला । थी थी ऐतिहासिक थाय् दःगु थुगु वडाया बिस्कं इतिहास नं दः । भोलाछेँ , मूलाछेँ , चोछेँ , लालाछेँ , ब्यासी , तुछिमला थी थी ऐतिहासिक थाय् कः घाड च्वंगु थुगु वडाया अपायाय् इयो (टेराकोटा) बुट्टां जःगु कुं इयो, मच्छेनारायण मेला, महाकाली-महालक्ष्मी जात्रा, छुमँ गणेशोया जात्रां थुगु वडा तस्कं लोकं हवा । नवदुर्गाया थःछेँ धायो तःगु थुगु वडाया महानवमिया दिनसं नवदुर्गागण या बहःनिथाकय् ख्वःपा ब्वइगु, तुछिमलाय् छखा आगन्छेँ अपाया टोरण (त्वरं) दःगु ऐतिहासिक वस्तुं थुगु वडा छगू बिस्कं विशेषता दःगु वडा काथं म्हासिइकय् फः । कलात्मक बुट्टा दःगु इयोया वडा काथं म्हासिइका पिब्वयो च्वंगु वडा जगुलीं थानाया अजगू इयोत संरक्षण याडः तय्गु कुतः मयासें मगा । नपां अजगु इयो दःगु छेँ थुवः पिन्ता उकिया महन्व काडः यंकय् मः ।

वडाया पुलांगु त्वालया लाँय लोहँतं व अपां सियो तःगुलि वडा सफा हे धाय्मः । थुगु वडाया डागः पुखु दःगुली नेगः पुखु ल्हाडः छ्वतसा छगः पुखु तपुयो स्कूल दय्कल । अः ल्हवडः भिंक तःगु भोलाछेँ पुखु व महाकाली लागाया अँचापुखु याडः नेगः पुखुदक ल्यं दःनि ।

थुगु वडाया अपलं मनूत बुँज्या साडः नैपुं जूसां ल्यासे ल्याम्होपुं नोकरी, पसल्या, डकःमि, सिँकमी, डाइबर पेशा याडः वयो च्वंगु दः । साविक वडा नं. ५ व वडा नं. ९स्वाडः अः या वडा नं.६ दयकगु खः थुगु वडाया अः थयं मथयं १०८२ म्हा जनसंख्या दः । गुकी मिजपुं ४४८१ म्हा मिसापुं ४६०१ म्हा दः । उकी मध्ये सच्छीखय् पी ब्वति वडाबासीपुं मेगु वडां व नगरपालिका व मेगु जिल्लां वयो च्वपुं खानय् दः ।

थुगु वडाया उत्तरपाखय् चाँगु नारायण नगरपालिका, दक्षिणपाखय् वडा नं. ५ व ७, पूर्वय् वडा नं. १० व पश्चिमय वडा नं. २ ला । थुगु वडाया १७ प्रतिशत जनतात शिक्षित खानय् दः । थुगु वडाया मूकं क्षेत्रफल ०.३४९८ वर्ग कि.मि. दःसा थानाया ऐतिहासिक थाय्ता मध्ये भोलाछेँ, चोछेँ, लालाछेँ, तुछिमला, ब्यासी, देकोचा, लिगंचा, मुलाछेँ, ब्यासी, बखुमला,



दुगुमला, कुथुमला थालाछेँ, महाकाली स्थान, दामलाचा, कासन, वन्ति खः । थाना घरधुरी १०५२ खा छेँ दः । भाति भाति क्रिश्चियन व बौद्ध धर्मया मनूत दः सां थाना अपलं हिन्दु धर्म मानय् याइपुं मनूत दःसा छुं भाति खय् (नेपाली) भाय ल्हाइपुं दःसां अपलं मनूत नेवः भाय् ल्हाइपुं दः । उकिं थाना अपलं नेवः त च्वडः च्वंगु दःसां भाति भाति दलित, क्षेत्री व सायँ (तामाड) तनं च्वडं च्वंगु दः ।

थुगु थासय् च्वडः च्वपुं नेवः तय्गु थर नं न्हिथानय् बह जुइकः थी थी पहः खानय् दः । गथेकि - दुवाल, सुवाल, कोजु, अवाल, प्रजापति, कुसाथा, त्यात, मलेकार, कक्षपति, जोशी, ग्वाछा, ताल्चाभडेल, जति, बज्जाचार्य, घेमोसु, नागा, पहिजु, खिम्बाजा, थुसा, साखकर्मी, गाइने, जरेजु, कजु, सत्ता, थिके, जोन्छे, लवजु, खड्गी, कासुला, भडेल, शिल्पकार, चोकामी, लवं, हामो, ग्वार्यंमरु, सिन्ताकल, शर्मा, कुम्पाख,



न्हयध्गूगु स्वप पौ. बःछि पौ(पाक्षिक)

बैद्य, कर्माचार्य, शाक्य, बासी, सूजखू, खायमली, खागी, कस्ती, तचामो, खिउंजु, नेपाली, शाही, बजिको, उलक, गाईजु, धुसु, तजले, महर्जन, मधिकर्मी, मूल, डाकुसि, कोण्डा, चवाल, नापित, लागे, सितिखि, भोखा, कायष्ठ, सिजखव, नाखण्ड, भोमी, सैजु, तपोल, चित्रकार, छुंजु, सांगाछे, ध्वंजु, मुनंकर्मी, बासुकला, खिटिबकु, कैटी, कुलुजु, याकामी, परियार, थापा, शाख, खाताखो, रंजित, खिनाव, गपि, पलिखेल, मानन्धर, तिमिला, नकर्मी, देशेमरु, हाडा, दुमरु, कपाली, लाखा, श्रेष्ठ, त्वानाबासु, राजचल, त्वायना, बाटी, लघु, दथेपुथे, भट्ट, गन्धर्ब, नायभा, चांगुभारी, बंशमनी, फैजु, तुल्सीबाख्य, राजथला, पालिख्य, नायजु, फाँजु, भट्ट, राजभण्डारी श्रेष्ठ, दिस्ती, चुल्याद्य, खाइतु, तमाखु, प्रधानाङ्ग, खोतेजा, आचार्य, जाकीबन्जार, छावा, जताधारी, सिमाक, पकानेवार, मुलगुठी, सुलु, गोजा, बखाद्यो, लाखे, कुचमनी, ताक्रा थजपुं दः ।

अः भोलाछेँ च्वंगु पुखु या छगू किम्बदन्ती दः । ऐतिहासिक कालय भौ व छुँ ल्वाड उगु पुखु दःगुलिं भौल्वा छेँ पुखु धःगु दक धायो च्वंगु दः । उगु छुँ भौया ल्वापुख्य छुँ भौयाता बुकः छुँ थःगु (छुँगः) छेँ अः याय् छुँ गणेद्यो थाय् वांगु खौ धायो वयो च्वंगु दः । वहे ल्वागु थासय् थुगु पुखु दःगु धायो च्वंगु खः । अलय् अः छुमः गणेद्योया देगः दः थाय् छुँ वांगु धः थाय् अः छुँ गणेद्योया देगः दः ।

थुगु ऐतिहासिक पुखु ख्वप नगरपालिकां ल्हवड तस्कं बालाक दय्के धुंकल । उगु पुखुली भेटयं दाडः पुखुली नाः रिसाइकलिङ्ग मज्सेलिं नाः ध्वगिड डा सीगु अलय् पुखुलीं नाः ज्वःगु स्थानीय जनतां धः सेलिं उगु पुखु ल्हवंगु खः । वडा समितिया हःनयँ च्वंगु पुखु फोहर जुयो वडः समिति व उगु थाय् हे बाँमलागु, आनाया डा म्यगु ल्याचा पिब्वय मःगु, बोरिङ्ग ल्हवनय्मःगु, पुखुली फोहर वाइगु, पुखुयाय् नाः छेँ दानय्ता कायो पुखुली नाः म्हवँ जुयो डा सीगु, बार ल्हवनय्मःगु थजगु अनेक समस्या वसेलिं वडा कार्यालयया न्हयलुवाय् पुखु पुनः, निर्माण ब्यवस्थापन समिति दय्कः जनप्रतिनिधि सिद्धिराम अवालया नायो सुई हिंछम्हासिया भोलाछेँ पुखु संरक्षण समिति दय्क उगु समिति दां भारी विकुलाल सुवाल, दुजः पुं गौतम

थिके, कृष्ण भक्त चांगुभारी, महेन्द्र मलेकार, सुरज बजिकौं, तुल्सी नारायण कुम्पाख, कृष्ण भक्त दुवाल, रश्मी खिंबाजा, दयालक्ष्मी थुसा पुं दःगु खः । निरिक्षण व अनुगमन समितिया कजि गोविन्द दुवाल, दुजःपुं सीता देवी नेपाली, सिद्धिराम अवाल, रश्मि खिं बाजा, कुमार कुम्पाखपुं च्वडः द्यगु खः ।

समिति निस्वानय् धुंकः वडास्तरीय बजेट विनियोजन याडः नगरस्तरीय बजेट ह्यता वडाया प्राविधिकं यागु लगत इस्टिमेट नगरपालिकाय् छ्वयो, प्रमुख-उपप्रमुख निर्माण समितिया कजि, नगरपालिकाया इञ्जिनियरपुं नपां छलफल याडः नगरपालिकाय् ध्यानाकर्षण याडः ल.ई. स्वीकृत जुयानिं वडा कार्यालयया उपभोक्ता समिति निस्वाडः कृष्ण भक्त दुवालया नायोसुई छ्याञ्जे विकुलाल सुवाल, दांभारी मञ्जु कुम्पाख, दुजपुं सरु चांगुभारी व हरिभक्त सांगाछेँ पुं च्वड दल ।

उपभोक्ता समिति निस्वानय् धुंकः उपभोक्ता समिति व वडा कार्यालयया न्हयलुवाय् स्थानीय जनतातय्गु ग्वाहाली बोरिङ्ग नाः थाकायो पुखुया भेटे इयो चा थाकायो ग्वाहाली याता । डोजरं नं चा लिकाल । कोरोनाया इलय् नं जिल्ला प्रशासन, नगरपालिका, प्रहरी प्रशासन, वडा कार्यालय व स्थानीय जनता मिलय् जुयो सुरक्षा मापदण्डे च्वडः ज्या न्हयाकं तुं च्वना । बजेट वय लिपा लागुलिं वडाया जनप्रतिनिधि जु पिन्के नेगू लाख धेबा त्याड जूसां ज्या न्हयाकला । नपां अपा, फि, सिमन्टीया ब्यापारीतय्सं नं थिकः सामान बियो हला । लकडाउनया इलय् चान्हय्-चान्हय् सामान हयो न्हिनयँ पुखु ल्हवनय्गु ज्या स्थानीय बासी पिसं याड दल । ख्वप नगरपालिकापाखं पुखु ल्हवनय् कानय् याय्ता रु. ३१,३९,२९१।४७ बजेट छखय् लिइकय्ता ल.ई. यागुली मुक्कं खर्च २८,१४,५०१।५५ व मूल्याङ्कन रु. ३४,४५,९९७।९९ वगु खः ।

स्थानीय जनतातय्गु न्हयलुवाय् जनश्रमदान व ग्वाहाली पुखु ल्हवनय् ज्या इलय् हे क्व चःगु नपां म्हवचा धेबां अपलं ज्या जूगु दः । स्थानीय जनता. थःगु धाय्गु भावना ब्वलांकः ज्या सांगुलिं अः भोलाछेँ पुखुया रुप हे ह्यगु थें खानय् दत । नपां पुखु संरक्षण समितिं पुखुया चाकलीं फोहरा तय्गु नपां प्यखेरं कुं कुनय पोल तयो मता नं तयो च्याकगुलिं बःहनी पुखु भन हे

**नगरपालिका भीगु हे संस्था खः
इलयहे करपुल ग्वाहाली याय्नु**

मोहनी नखा, संस्कृतिया लुखा

• आशाकुमार चिकंबञ्जार

संस्कार व संस्कृति जातीय म्हासिइकाया दापु खः । दसु खः । संस्कार व संस्कृति डाय्कः च्वंगुलि उगु संस्कार जातीय पहः कः धाडः ऐतिहासिक ताकी गः गं थुयो नं संस्कार डालः च्वनि, मथुसां नं समाजया ग्याचिकु पह खाडः ग्याडः संस्कार डाय्कः च्वनि । उकी मध्ये नं गुगु नखा तिइजक डाय्कीसा गुगु नखा तः जिक हानी । उकी नेव, संस्कारे नखा-चखा भीगु हिनुली हिन्हाड च्वंगु दै । गुगु संस्कार त्वःतल धःसा धात्थे भीगु म्हासिइका सीइ । मनू जुयागु अर्थ मदयो ब्यर्थ ताय्की ।

कौला वलकी बुलुहुँ सुपायँचा चिलः वाडः सर्ग खापाचःथे चाल वै, कःसि पिड तःगु कःसि तपवचा स्वं बुलुहुँ मोहनीता स्वः वई प्याखं स्वः वांबलय् लिनय् लाड प्याखं खानय् दय्केता ग्वाली ल्हाड स्वयो च्वंम्हा ल्यासे म्हायाय् मचा थे । तः फवः स्वं नं ककुल्हाड मोहनी गना थ्यंकः वला थे जक स्वयो च्वनि । मोहनी गुली हः नय् वै उब्ले हे व भन हवयो लय् लय्ताई । देवीया शिलय् च्वनय् दैगु आशां अलय् म्येँ नं थ्वै

देवी ब्रम्हा याय्के शिलय्सं स्वानं छाय
नुव पासा भी मुना हरि भजन याय् ॥

धात्थे मोहनी देवी शक्तिया प्रतीक काथं छ्यलः तःगु खानय् दः । पुरुष प्रधान समाज वय हौं नारी प्रधान व नारी शक्ति नं उलि हे बल्लागु शक्तिया काथं ब्वयो च्वंगु खानय् दः । मोहनीया पुलां खाँ प्वलः स्वयबलय् थुकी मानव समाजया विकासया काथं स्वय माली । ख्वपया अष्ट भूजा काथं अष्टमातृका छसिकाथं ब्रम्हाया शक्ति ब्रम्हायणी, महेशया महेश्वरी, कुमारया कुमारी विष्णुया विष्णुबी (भद्रकाली) बराहया बाराही, इन्द्रया इन्द्रायणी, महाकाली, महालक्ष्मी तयो तःगु दःसा दशवी लाक त्रिपुर सुन्दरी तयो शंखाकारया ख्वपदेता रक्षा याडः तःगु बंशावलीचवयो तःगु खाँ विज्ञपिसं धायो तःगु दः । अलय् थाय् थासय् गणेद्यो तयो थःगु थाय्या लागा गणेद्यो पुजा याइगु नं चलन दः ।

दकलय् लोकं हवागु, ख्वप देया आस्था व अभ् धाय् धार्मिक काथं आस्थाया त्हांगु विश्वास नवदुर्गा द्योया थी थी प्याखं नं अनुसन्धानया विषय पक्का नं खः । प्रा.डा. पुरुषोत्तम

लोचन श्रेष्ठ जुं थुगु विषय सं पि एचडी याड द्यगु तस्कं साहसया खाँ खः दक अपलं मनूतय्सं धायो च्वंगु दः । उगु खाँ छुलय् धः सा थुकी दुनय् दुनय् धायो वयो च्वंगु किम्बदन्ती रहस्य खाँतनपां लोकोक्तिं नं थुकियाता अजनं म्वाकः तः सां अः वयो छुं भाति विश्वासया इगिदिगी सांगु खाँ न्यनय् दयो मवगु मखु ।

नव दुर्गा द्योया खिं, तँ या इशारां ल्हूइगु प्याखं जडगली युगय् नगराथाडः सावधान याइगुया प्रतीक जुयफः । उब्लेया स्वरूप नवदुर्गाया ख्वः पा खः ला ? अलय् 'लाथाय् नइम्हा गाथा' जक गुम्हां गुम्हांसिनं धाइगु खाँ वाय्क स्वयबलय् सु लायो न्हायाथाय्सां च्वडः देडः बियहःगु नैगु जक मखु मु बाहौं लिकिगु (मिबां लुकिगु) काथं बुई 'त्वः त मू बाहौं ज्वडः लुसिं जक हवः खाडः म्वाही त्वनिगुलिं आदिम सभ्यताया सिकारी युगया किपालु खानय् दः । अलय् ल्यू योल्क्यो पाँ यो पाँयो (अप्रभंश) (लियो लियो पायो पायो) सलं नं सिकारया इलय्या भल्को क्यं ।

मेगु स्वापु खः खँ म्येँ, च्वयन्हि थाडापुं देवी पिन्ता स्वन्तकी तानय्गु व मता ब्यू वानय्गु इलय्या थी थी ज्यात नं स्वय बहः जू ।

चाकलीं बुई वागुजी म्हवय -म्हवय् धायो क्व छुथे ज्यापु दाजुया कमाई द्वहँ वैगु आशं ख्वः चकां । अज नखा बलय् लय्तां नःगु नसा व त्वसा खं वागुजी थे हे क्वः छुकः लसतां जाय्क हालिगु 'मालश्री' सिरिसिरी फसं फिरिफिरी





न्हयधगुगु स्वप पौ. बःछि पौ(पाक्षिक)

सांगु वामा थें भाति भाति धे धे चुइकः जुइपिनिगु न्यासि नं स्वय हायँपु । मोहनी बलय् न्हँगु वाया बजी ल्हूयो कुछि भव्य नयमः दकः तिक्ववा लयो लाहातं वा दायो न्हँगु वन्दाया प्यचा न्यलः वहे प्यचाया देनयँ न्हँगु नलास्वं भ्यो ह्यो वहे भ्योख्य लाजा त्यछ्वः तयो खुसी नं पाँचा ह्यो नलास्वानी । तिक्व वा पिडः तिक्वः च्वयो वा दायता वाबुँ गांकय्गु ज्यात अः धः सा मयाय् धुंकल ।

नला स्वानय्गु (कृषि) बुँज्या नपां स्वापु दःगु खः । नलास्वं धुकुती साली । गना थः थः गु लजगाया ज्या भः ता पुजा याई । अथे नं शाक्तिया प्रतीक काथं देवीया दैवी शक्ति थः कय सालः असत्यता विरुद्ध सत्य खायँ ल्वाय्गु स्यनिगु मोहनी नखाता विजया दशमी दक धःगु खः । अलय् व स्याक्वत्याक्व नपां व क्यातुगु नलिगु नलास्वांया स्वापु धःसा बिस्कं हे दय्मः ।

नला स्वं सालय्गु (Germination/बिजांकुरण) पु सालय्गु सयकगुया छगु बिजयोत्सव नं जुयमः धाय्गु छगु पक्ष नं स्वयमाली । समाज विकासया ताकी ग गं व बलय्या व सिकारी युग, जङ्गली युगया प्रतीक काथं नवदुर्गा द्योया जात्रा नपां उब्लेया लुमन्ति वियगु द्योया ख्वःपा नं काय् फः । अलय् उगु सिकारी युग त्वःतः कृषि पेशा हानय्गु इवल्य्या पु सालय्गु ज्या थःगु छँ वा छँ हःनयँ याडः माः बुइकगु व वहे नलास्वं याता धन्यया प्रतीक काथं कपालय् छुयगु यागु जुयमः । उकीं मोहनी नखाकृषि क्रान्तिया न्हापांगु पला न्ह्याकगू काथं विजयोत्सव डाय्कगु नं जुयमः । उब्ले तलेजु नपां ज्वडः कोशी टप्पुं व बलय् नय पित्याडः तलेजु माजु कय् न्यडः थाना नं पुर्वपाख्य वानि बलय् छु ध्वातुला वहे ह्यो बली बियो नः धःगुलिं आना अर्ना मँ नपालाड ज्वड ह्यो स्याड नगुलिं तलेजुई कोटय् मँ पालिगु अलय् हिम्हुकीगु चलन अः तक नं ल्यं दः गुलिं श्व सिकारी युग व कृषि युगया दशवीया इलय् निसँ डाय्कगु खः ला? अध्ययनया विषय जुयफः ।

ईलं पह हिल वसेलिं बुलुहुँ महिषासुर बधः व हिं च्यापा लाहा दःम्हा भगवती देवीया सृष्टि जुल । गना नारी शक्तिया बयबय याडः तःगु व देवी दुर्गाया लाहातय् अनेक ल्वाभः ज्वडः तः थें नलास्वं सालिगु धुकुति नं किसान तय्सं थःगु बुँज्याया इलय् छ्यलिगु ज्यांभः तः नं पुजा याडः धुकुति खा, हायँ (नैक्य अः लिपा) स्याड हि छाइगु नं चलन पुलां मजुनी । व नपां धर्ती वइगु खुसीया पाँचा, कोथाय् इलिगु ताकिचा, बाँइलय्ता छ्यलिगु सिँचा फुक्क भ्नीगु धर्तीमाताया क्वचा खः । धर्ती नं नारी

शक्ति खः । अलय् धर्ती दुनय् सृष्टि दै । वहे धर्तीया सृष्टि अन्न जक मखु स्वं नं थुगु इलय् या छगु विशेषता खः ।

थुगु इलय् निसँ ह्वइगु ग्वंगः चुली स्वं स्वन्तकी तानिगु इवल्य् खचाय् तयो यंकिगु खाँ उली न्हि थाडः तःगु मरु । थुगु स्वं स्वंमा नपां खचाय् तयो यंकिगु व बुरां ज्याया इलय् स्वंकुख्य मा नपां तइगु बाहेक मेथाय् तस्कं म्ह्वँ थासय् जक छ्यलिगु याई । अलय् थुब्लेया तःफव स्वं, बाहेतपव स्वं, कःसि तः फवचा स्वं धः सा थी थी काथं छ्यली । तः फवः स्वं गनां फवः नपां, स्वन्तकी तानिथाय् माँ नपां व गनां कुतिकुति याडः छाई । अथेनं थुगु इलय् नलास्वं धः सा मह्वइगु स्वं जूसां कपालय् छुयगु याई ।

च्वथां निसँ मा नपां लिडः हैगु पालुनपां घाकः हैगु पालुमा वहे पालु दकलय् न्हःपां पालुबा दः पिसं भिसिंद्योयाता छायो भिसिंपुजा निसँ दशमी स्वाडः न्ह्याकिपुं नं दः । अलय् धुकुती, मेसिन, मोटर, मोटरसाइकल थजगु यातायातया पुजा बलय् नं पालुमा नपां तुमा नं तैगु खः । थथे ग्वंगः चुली स्वंमाः तः फवः स्वंमा पालुमा, तुमा नपां तयो पुजा याइगु मोहनी नखाया बिस्कं विशेषता मखु जक गथे धाय् फँ ? अलय् व ता ई तक सुकु मचिइगु भूस्वं धः सा उद्योग, थाज्या थाय्गु तां खय् जक तै । अलय् धुकुती ग्वंगः, हायँ स्याइसा, तामय् मिखुंचा स्याइ । अलय् मोहनी नखा बली प्रथा नपां बुलुहुँ थाकुयो वल । फछिंफक्व मेपिन्ता घमण्ड याडः क्यनय्ता दां त्याडः जूसा नखा हानय्गु यात । अलय् तःमि पिन्ता नखा नसा जूसा चिमिपिन्ता कसा जुल । अलय् उगु इलय् गाईंचां म्यँ हाल दशमी च्वय्क वै त्वाल्य् -त्वाल्य् सारडगी थाडः । उब्ले मालश्रीया धुन न्यंकः मनूतय्ता नुगः कय् च्याकः बिई । नुगः हे खुलुलुलु मिंक उगु म्यँ या धुन न्यंकीः । छपु मालश्रीया लोकं हवागु म्यँ थथे दः-

मोहनी नखा थयंक वल

छँ छुँ हे दःगु मखुनी

मचात चियाँ मियाँ ख्वलरे दैव

जिगु नुगः खुलुलुलु ख्वल रे ॥

नययात नसा मरु

तिययात तिसामरु

च्वनय्यात बास जिनं मरु रे दैव

जि नुगः खुलुलुलु ख्वल रे ॥

थथे अभावया जा ताडः, गरिबया ख्वबी हाय्कः, नुग ख्वःगु गरिबया नुगः खाँ लोक म्यँ खय् दुतिड तैगु धात्थे हे

न्हयध्गुगु स्वप पौ, बःछि पौ(पाक्षिक)

जुल । अलय् राजनीतिं मप्यागु जीवनता धर्मया तपुलीं पुइक अन्धविश्वासया जःसि खुडः गुब्लें थाहाँ वय मफय्कः पुर्व जन्म व पुनर जन्मया खिपतं चिड खँ में थें अनेक सास्ती याड यो सां मयो सां सति छ्वयो च्वनि । अलय् 'खाचाय् ला नेक्व नेक्व मैया ला यक्व यक्व' दक नं म्यें हाली । अलय् खँ में थें नवमि खुनुं स्याइम्हा में याता मउसिं छँगु तुकः महिषासुर स्याडागु दक धाइगु लिं खँ में नं वहे काथं विश्वास याडः खवपय छगू बिस्कं पहः या जात्रा काथं डाय्क च्वन । उगु छँगु तुकः फुक्कसिया छँ यखायो पाडः तै । गुम्हासिं उगु ला (छँगु) लिपा छुयो नै सा गुम्हासिं थाज्या थाय्गु थू छँ दय्की । फूलपाती खुनुं स्याइम्हा उम्हा में या ला सुकुला खाड नं तै । अलय् मेबलय् धःसा नेवः तय् सुकुला खानय्गु म्हवँ जक याई ।

आश्विन शुक्ल प्रतिपदां नलास्वाड आश्विन शुक्ल पुन्ही पाँचा वाय्गु पुन्ही (कतिपुन्ही/कोजाग्रत पूर्णिमा) खुनुं नलास्वाडागु पाँचा नपां खुसी चुइकय् यंकः नखा क्वचाय्की ।

उगु पुजायाडः तःगु धालाँचाय् च्वंगु श्वँ खय् तपुयो तःगु केरामाया लप्ते देनेया काचिगु ला दशमी खुनुं छुयाला छुयो, छयँ कालः खायाय् गःचा छुयाला छुयो न्यां सम्हय नई । धालाँचाय् च्वंगु श्वँ पालंपः था स्वयो सामुहिक भावना पिब्वई । ब्वां काय्पिन्ता आशिष बिइगु श्व श्रद्धाया नखा खः । अलय् सलिचाय् फँगु मोहनीया ल्याखं भिंमभिं ल्याखाइगु छगू अदभूत खॉ नं मोहनी बलय् याइगु मध्ये छगू खः ।

थुगु इलय् जडिबुडी नयो तःपुं च्याडग्रा व बरुव फँ या ला नयमःगु नपां तामय् जवय् भिसिंछो धायो मिखुंचा स्याई सा

देव पाखय् ससूद्यो धायो दुरु लुकी । मचातय्गु साफू नं आना हे तयो मचातय्ता स्वं क्वकाइ खुनुं लः ल्हाड बिई । अलय् बिस्काबलय् बेतः द्योयाय्के मिखुंचा स्याइगु, मोहनी बलय् तामय् मिखुंचा स्याइगु याडः तः गुयाय् नं छुं अर्थ मदै मखु । अलय् गुबले बाली लगय् याइबलय् छ्वः पु, कःबापुं, लाभा, प्याज पिइबलय् दनकिं लाथाकिला याइगु दकः चान्हयँ उगु थासय् बौ तयो खाः स्याड सम्हय नयो वैगु चलन दः । अलय् बेतः द्योकय् मिखुंचा स्याइपिसं बौजक तःसा गा दक अन्धविश्वासया भर कायो च्वंगु दः ।

मोहनी नखा थः थितिया स्वापु ल्यंकः तैगु नखा नं खः । तहांगु थुगु नखाखय् थः थितिपिन्ता भवय सः मतसिं मगा , थुब्ले भवँ सः मतसा थः वं त्याजिइगु दक भवँसःत वय धुंकः वय फँगु वा मफँगु खॉ ब्याकय् मः । थुगु इलय् नलास्वं बियो सिन्हंतिकः मोहनी तिकः, तुलबाला (हयाउँगु क्वखा) बियो थाकाली पिसं सुवः विइगु चलन दः । थुगु इलय् फयां फक्वः तः जिकः भवयँ नकेगु कुतः याई । म्हयाय् मचा, जिलाजुं, भेनामचापुं फुक्क भवयसःत नकेगु याई । थौं कन्हे दक्षिणा अपलं बियगु विकृति धःसादुस्वः वय धुंकल ।

न्हयागु थजु भगवान रामं रावण नपां ल्वाडः त्याकगु धः सां, दुर्गा मातां महिषासुरता स्याड त्याकगु दिन थजु श्व विजया दशमी खः । देशय् कोरोना ल्वचं दुःख बियो च्वंगुलिं भिं उसायँया कामना याय्गु जक मखु थुगु ल्वय नपां ल्वाय फय्के माल । नपां देशय् थी थी विकृतित दुस्व वयोच्वंगु जुल । एमसी सी याड दे हे दैला मदैला ? भ्नीगु सार्वभौमिकता

ल्यनिला-मल्यनिला ? धात्थें नवदुर्गांमाता दःगु खःसा सकलं नेपःमि पिन्ता सद्वुद्धि बियो समाज व देया नितिं ल्वाय फँगु बः बियमः । अलय् मोहनी नखाया थुगु ग्यापुगु इलय् कोरोना भवल्वचं मपुंकः मडांक जुयगु बुद्धि बियमः अथे जुय फय्मः सुस्वास्थ्य, व भिं जुयमः दक कामना याय् । कुमारी पुजा नपां नलास्वंता आयूर्वेदिक वास काथं नं कायो च्वंगु खॉ थुइकः वनस्पति नपांया स्वापुया खॉ ल्हाल्हां मोहनी नखाया भिन्तुना संस्कार डाय्के ।



खप नगरपालिकाया ज्या भवः त

खपया रानीपुखु
लह्वनय्गु ज्या क्वचाइन

सांसद सुवाल व प्रमुख
प्रजापति लान्चा फल्चाय्
स्वभाल



नेमकिपाया सांसद प्रेम सुवाल व खप नगरपालिकाया प्रमुख सुनिल प्रजापति जुं खप नगरपालिका वडा नं. १० य् दाडः चवंगु लान्चा फल्चा जाय्कः प्वहँ चिडः च्वथाय् असोज १२ गते स्वः भाल । उगु फल्चाय् अपलं स्थानीय पिसं जनश्रमदान याडः चवंगु दः ।

खप नगरपालिकाया प्रमुख सुनिल प्रजापति जुं खप नगरपालिका वडा नं. १ सल्लाघारी चवंगु खपया ऐतिहासिक रानीपुखु लह्वनय्गु ज्या क्वचाइथें चवंगु इलय् ज्या गुलि ल्यं दःनि, गुलि गथय् सिधला दक सिडकेता असोज १२ गते आना हे भायो स्वयो दिल । खपया रानीपुखुया ज्या क्वचाइ थें हे चवनय् धुकल । उगु इवलय् वयकं भाजु पुखुयाय् नं निरीक्षण याडः दिल ।



दमक नगरपालिकाया उप प्रमुख अधिकारी खपय्

असोज १८

खप नगरपालिकाया प्रमुख सुनिल प्रजापति जु नपां दमक नगरपालिकाया उप-प्रमुख गीता अधिकारी बिहिवार नपालाड दिसे खप इञ्जिनियरिङ्ग कलेजय् भायो नेगु नगरपालिकां शिक्षा, स्वास्थ्य, विकास-निर्माण थजगु ज्याखय् याडः च्वंगु ज्या इवःया अनुभव काडः दिल । उगु इलय् प्रमुख प्रजापति जुं वयकता खादा क्वखायक भीगु थःगु पहः या म्हिचा लः ल्हाडः बियो लसकुस याड दिल ।



नपालाय्गु इवल्य् प्रमुख प्रजापति जुं खप देया बःचा हाकलं म्हासिङ्का पिब्वयो दिसे थानाया विशेषता नगरपालिकापाखं न्ह्याक च्वंगु आवास योजना व शिक्षा, स्वास्थ्य, सम्पदा ल्हवनय् कानय्या ज्या नपां विकास निर्माणया खाँ ब्याक दिल ।

खप दे पुलाँगु सहरता सम्पदाया सहर काथं विकास याय्ता नगरबासी पिन्ता ३५ प्रतिशत अनुदानया ब्यवस्था याडः वयागु सांस्कृतिक संरक्षणय् मदिकक हज्याड च्वंपुं संस्कृति कःमि पिनिगु योगदानता हनाबना यासे दायँ दायँ सं सांस्कृतिक गुरुपिन्ता हानेज्या याडः वयागु खाँ काडः दिल ।

खपया सम्पदा ल्हवनय्-कानय् याय्ता विदेशी संघ-संस्थातय्सं अपलं चासो क्यडः च्वंगु खः सां खप नगरपालिकां तः भवखाचां स्यंकः ब्यगुयाता तस्कं भिंक जनताया ग्वाहालीं उपभोक्ता समितिपाखं दाडागु खाँ ब्याकसे सम्पदा निर्माणय् जनताया अपलं ग्वाहाली दःगु खाँ काडः दिल ।

दमक नगरपालिकाया उप-प्रमुख गीता अधिकारी जुं दमक नगरपालिका पूर्वी नेपः या मेची अञ्चलया भापा जिल्लाय् लागु सहर मध्ये छगू खः धायोदिसे हिगू वडाय् ब्वः थ यो तःगु थुगु वडाय् थी थी जात जातिया मनूत च्वडः च्वंगु दःधायोदिल ।

दमक नगरपालिकाय् च्वनय्ता तस्कं काथं छिंगु सहर जुगु धायोदिसे ब्यवस्थित सहर दय्केता दमक आवास योजना न्ह्याकय्गु कुतः जुयो च्वंगु नपां थी थी थासय्या अध्ययन याय्गु इवल्य् खपय् वयागु खाँ उप-प्रमुख अधिकारी जुं काडः दिल ।

कोभिड महामारीया दश्वी जनताया स्वास्थ्यता हदाय तयो धेबा म्वायक कोभिड अस्पताल न्ह्याकागु, नपां स्थानीय पाठ्यक्रम दय्केगु, साफूकुथि न्ह्याकय्गु हिंसाय् लापुं मिसातय्ता संरक्षण व ब्यवस्थापनय् बः बियो वयागु खाँ ब्याक दिल ।

अथेहे खप नगरपालिकाया प्राविधिक इञ्जिनियर ओमहरि था जुं नगरपालिकां न्ह्याकः वयो च्वंगु तुमचो-दुगुरे लिवालि देको मिबा इतापाके योजनाया प्राविधिक विषयसं जानकारी बियो दिल । उप-प्रमुख अधिकारी जुं खप नगरपालिकाया कार्यकक्ष, शाखा, उपशाखा नपांया स्थलगत निरीक्षण याडः द्यगु नपां खप अस्पताल, खप इञ्जिनियरिङ्ग कलेजया अवलोकन याडः दिल । उगु इवल्य् प्रमुख प्रजापति जुं वयकता खपया लोकं हवागु म्हवय्खा इयो व नगरपालिकाया पिथनात उपहार काथं लः ल्हाडः दिल ।



नपालाय्गु इवल्य् खप नगरपालिकाया प्रमुख प्रशासकीय अधिकृत रामलाल श्रेष्ठ ज्यू, खप नगरपालिका वडा नं. ७ या अध्यक्ष उकेश कवां, नगरपालिकाया प्रशासकीय अधिकृत दामोदर सुवाल, खप मा.वि. या प्राचार्य प्रकाश श्रेष्ठ, खप इञ्जिनियरिङ्ग कलेजया प्राचार्य सुजन माक व खप कलेज अफ इञ्जिनियरिङ्गया प्राचार्य सुनिल दुवाल नपां दमक नगरपालिकाया प्राविधिक कर्मचारीपुं उपस्थित जुयो द्यगु खः ।

खप अस्पतालं जनताता स्यल्लागु सेवा बियमः नेमकिपा नायो नारायण मान बिजुक्छं

असोज १५

नेपाल मजदुर किसान पार्टीया नायो नारायणमान बिजुक्छं (का.रोहित) जुं अस्पताल पाखं गुणस्तरीय सेवा बांलाक बियता ब्यवस्थापन पक्ष तस्कं बांलाक याय्मः धायोदिल ।



शुक्रबार खप अस्पतालया स्टाफ नर्सपुं नपां नपालाय्गु व प्रशिक्षण ज्याइवःसं न्वचुतयो दिसे नायो भाजु नारायणमान बिजुक्छं जुं खप अस्पताल निःस्वांगुया उद्देश्य व अस्पताल्य ज्या साडः च्वंपुं चिकित्सक नर्स व कर्मचारीपिनिगु काम, कर्तब्य छु खः दक प्रशिक्षित याडः दिल ।

जनताया साथ व सहयोगं निस्वांगु खप अस्पतालया सेवां जनतां बिश्वास याडः ग्वाहाली दैगुलि अजगु काथं सेवा याय्मः खप अस्पतालं समाजवादी सिद्धान्त काथं जनताया निःस्वार्थ सेवा

याय्मः धायोदिल ।

वयकलं जनताया सांस्कृतिक स्तर ग्वाकय्ता ताः ई लगय् जुडुगु खौं ब्याकसे जनताया चेतनास्तर थाकाय्ता व नागरिक भावना जागृत याय्ता ब्यवहारिक व राजनीतिक कक्षात न्ह्याकय् मः धायोदिल ।

खप अस्पताल्य ज्या सानिपुं चिकित्सकपिसं थःगु व्यक्तिगत स्वार्थता नितिं मखुसें समाजया भिं याडुगु काथं ज्या याडुगु विश्वास प्वंकः दिसे नायो भाजु बिजुक्छं जुं भीसं याडुगु भिंगु ज्याखं समाजता नं बांलाक यंकिगु खौं नं काड दिल ।

अस्पताल्य ज्या सानिपुं नर्सपिसं ल्हाडुगु नम्रबोली व ब्यवहारं सेवा प्रवाह खय् सकारात्मक भूमिका म्हितिगु खौं ब्याकसे वयकलं सेवां जनताया विश्वास त्याकिगु उद्देश्य नेमकिपां तयो ज्या साडः वयो च्वंगु खौं नं ब्याक दिल ।

वहे इवल्य खप अस्पताल ब्यवस्थापन समितिया नायो नपां खप नगरपालिकाया प्रमुख सुनिल प्रजापति जुं अस्पतालं बिडुगु सेवासं जनतां बिरोध याय् म्वाय्कः व द्रुपं विडुगु काथं छुं नं याय् मज्युगु धायोदिसे चिकित्सक पिनिगु बांलागु ब्यवहारं जनताया अस्पताल थःगु हे अस्पताल थें तायकिगु खौं ब्याक दिल ।

वयकलं खप अस्पतालं मेगु अस्पताल स्वयो भिंकः बांलाक सेवा बियता जुयमःगु खौं ब्याकसे खप नगरपालिकाया ज्या व सेवाखं जनतात लयतायो हे अक्सिजन प्लान्ट दय्केता अपलं साथ व ग्वाहाली ब्युगु खौं काड दिल ।

प्रमुख जु गणेश मा.वि.

खप नगरपालिकाया प्रमुख सुनिल प्रजापति जुं खप नगरपालिका वडा नं. १ भार्वाचोय च्वंगु गणेश मा.वि. असोज १२ गते निरीक्षण याड दिल ।

वयकलं उगु ब्वनय् कुथिया प्र.अ. गणेशराम थुसा नपालाडः दिसे ब्वनय् कुथिया शैक्षिक अवस्था व आखः ब्वंकय्ता गुगुकाथं कुतः याडः च्वडा दक न्यडः दिसे जानकारी कायो दिल ।



इञ्जिनियरपिसं राष्ट्रविकासयानितिं बालाक ज्या याय्मः का.रोहित

नेपाल मजदुर किसान पार्टीया नायो भाजु नारायण मान बिजुकछें (का.रोहित) या मू पाहाँल्य् खप इञ्जिनियरिङ्ग कलेजय् शैक्षिक शत्र २०७७/७८ या एम.ई.इन अर्थक्वेक व एम.एस् सी. इन अर्वािन डिजाइन व कन्जर्भेसन विषयसं स्नात्तकोतर तहलय् न्हँपुं भर्ना जूवपू ब्वनामिपिन्ता लसकुस व अभिमुखिकरण ज्या इवः शुक्रबार क्वचाल ।

ज्या इवःसं न्वचु तयोदिसे नायो भाजु रोहित जुं इञ्जिनियरपिसं राष्ट्रया विकासया लागिं महत्वपूर्ण भूमिका म्हितय्मः धायोदिल । अलय् थःकय् दःगु सीप ज्ञान व कुशलता भिंगु थासय् छ्यलः समाज व देशया भिं ज्याखय् छ्यलय् मः धायो दिल । वैदेशिक सहयोगं यागु सम्पदा ल्हवनय्कानय् व विकास योजनां देया सार्वभौमिकता खय् घः लागु खाँ ब्याकसे नायो भाजु बिजुकछें जुं अनुशासन व इमान्दारिता हे खप नगरपालिकां चाय्कः तःगु कलेजय् ब्वनिपुं ब्वनामिपिनिगु म्हासिइका खः धायो दिल ।

वयकलं शिक्षाखय् यागु लगानी गुबलें हे सितिंमवानिगु धायो दिसे स्थानीय तहलं कलेज व विश्व विद्यालय न्ह्याकल धःसा अपलं अपः जनतां दांकः भिंक शिक्षा काय् दैगु खाँ नं ब्याक दिल ।



देशां देछिया ब्वनामिपिन्ता उच्चशिक्षा ब्वनय्गु मौका दःगु खाँ ब्याकसे वयकलं देया मुख्य-मुख्य पदय् च्वंपुं मनू तय्गु बिचःलय् ह्युपा मवः तलय् समाजय् ह्युपा हय थाकुगु खाँ ब्याक दिल । खप नगरपालिकां न्ह्याक च्वंगु कलेजत सेवामुखी जूगु खाँ काडः दिसे वयकलं समाजया निितिं चिन्तन याइपुं जनशक्ति पूर्ति याय्ता थुगु कलेजत निस्वांगु खाँ ब्याक दिल ।

कलेज ब्यवस्थापन समितिया उपाध्यक्ष नपां खप नगरपालिकाया उप-प्रमुख रजनी जोशी जुं अर्थक्वेक व अर्वािन डिजाइन व कन्जर्भेसन विषयया महत्वया खाँ ब्याकसे पुर्खा दयक-तकगु सम्पति ल्यंकः म्वाकः तय्ता थुगु विषय महत्वपूर्ण भूमिका म्हितिगु खाँ ब्याक दिल ।



कलेज ब्यवस्थापन समितिया नायो नपां खप नगरपालिकाया प्रमुख सुनिल प्रजापतिजुं ब्वनामिपिन्के समाज व देशया निितिं ज्या सानय्गु भावना दय्मः धायोदिसे इञ्जिनियरिङ्ग ब्वनिपुं ब्वनामिपिन्के इमान्दारीता मदय्कः मगा धायोदिल ।

स्थानीय तहलं न्ह्याकगु खप नगरपालिकाया कलेजं

इञ्जिनियरिङ्ग कलेजय् न्ह्याकगु नपां सम्पदा म्वाकः ल्यंकः तय्गु नपां सभ्य सहर दय्केता थुगु विषय तस्कं ग्वाहाली याइगु खाँ ब्याक दिल ।

ज्या इवःसं एम.ई. इन अर्थक्वेक विषयया विभागीय प्रमुख मन्जिप शाक्य व एम एस सी इन अर्वािन डिजाइन व कन्जर्भेसन या लिवास फैंजुं विषयगत खाँ काडः दिल ।

श्रमजीवी साकोसया साधारण सभा

असोज १६

खप नगरपालिकाया प्रमुख सुनिल प्रजापतिया मू पाहाँलय् खप नगरपालिका वडा नं. ६ याछेँ च्वंगु श्रमजीवी बचत तथा ऋण सहकारी संथा लिये नीकगू साधारण सभा व खुकगु अधिवेशन शनिबार क्वचाल ।



ज्या इवःसं नगर प्रमुख प्रजापति जुं एम सीसी सम्भौताख्य दःगु बुँदाख्य देशता उपनिवेश याइगु खतरा दःगुलि एमसीसी सम्भौता संसदं अनुमोदन याः सा नेपः दे अमेरिकी सैन्य गठबन्धनयँ वानिगुलिं श्व भीगु असंलग्न परराष्ट्रनीतिया अखः जुइगु खाँ ख्य सचेत याड दिल् ।

समाज हज्याकय्ता सहकारी संस्थां बिचः याडः पलाछियमःगु लाहातय् ज्या दैगु तालिम ब्यू ब्यू उत्पादनमूलक लागाय् लाय छ्यलय् मःगु खाँ ब्याकसे प्रमुख प्रजापति जुं ल्यासे ल्याम्होपिन्ता प्रगतिशील बिचःलं प्रशिक्षित यायमःगु नपां थः जक नय मधसिं भी फुक्कसिया धायगु सामुहिक भावना ब्वलांकय् बिय मःगु विचः प्वकसे नेपः या सम्पदा म्वाकः ल्यकः तयगुलि खपं सांस्कृतिक क्रान्ति हे यागु खाँ ब्याक दिल् ।

खप नगरपालिकां-शिक्षाता हदाय् तयो चाय्कगु कलेजं

देशां देछिया ब्वनामिपिन्ता गुणस्तरीय शिक्षा बियो वयो च्वंगुखाँ ब्याकसे वयकलं नक्सा बमोजिम छेँ दानय् मःगु व इलय् हे नगरपालिकाता पुलय मःगु करत पुल बियतानं इनाप याड दिल् ।

खप नगरपालिका वडा नं. ६ या वडाध्यक्ष हरिराम सुवाल जुं लबः नय्गु मतिं हे थः ब्यक्तित्ता जक भिं याइगु काथं चाय्कः तःगु बहुउद्देश्यीय सहकारी संस्थाता छख्य लिक्ः छवः छवं हज्याकय्गु भीगु उद्देश्य खः धायोदिसे देको मिबा इतापाके आवास योजनाया खाँ न्हिँ थासे वयकलं बुँथुव पिनिगु माग पूर्वांकय्गु काथं नगरपालिकां कुतः याडः च्वंगु खाँ ब्याक दिल् ।

संस्थाया नायो गणेशलाल फौजुं हलिमय महामारी काथं ब्यागु कोरोना भ्वल्वचं संस्थाया सामाजिक व ब्यवसायिक ज्याइवःसं बाँमलागु लिचवः लागु खाँ ब्याकसे श्रमजीवी साकोसं जनताया भिंगु ज्याख्य जक ज्या छ्यलः च्वंगु खाँ ब्याक दिल् ।

पीछकगु नेपाल भाषा सा हित्य तः मूंज्या ग्वसाखलःया नायो गणेश राम थुसा जुं पीछकगु नेपाल भाषा साहित्य तः मूंज्या खप कलेजया हःनय दबु दय्कः भौतिक उपस्थिति व अनलाइन पाखं नं जुइगु खाँ ब्याकसे धिसिलाक ज्या इवः न्ह्याकय्ता सकल सिया साथ व ग्वाहाली दैगु आशा याड दिल् ।

अथेहे संस्थाया न्वकु भाजु विकुलाल सुवाल जुं लसकुस याडः द्यगु ज्या इवःसं भक्तपुर जिल्ला बचत संघया जगन्नाथ प्रजापति जुं (शुभकामना) भिन्तुना न्वचु श्रमजीवी साकोसया लेखा सुपरीवेक्षण समितिया कजि वरुणा त्यातं वार्षिक प्रतिवेदन दांभारी नारायण प्रसाद लागे जुं आर्थिक ज्या इवः व प्रगति प्रतिवेदन पिब्वयो दिल् ।

ज्या इवः श्रमजीवी साकोसया छयाञ्जे पुण्यराम दुवाल याडः द्यगु खः सा निवर्तमान नायो भाजु मदन खाताखो नं न्वचु तयो द्यगु खः । ज्या इवःसं नगर प्रमुख प्रजापति जुं 'असल ऋणी श्याम कृष्ण हयौमिखा, पूण्यश्वरी खर्बुजा व असल बचत कर्ता राधेश्याम अवाल व रमिला कुसीता हानेज्या याड दिल् ।

दुबेङ्केगु फल्चा स्वः भालः

खप नगरपालिकाया प्रमुख सुनिल प्रजापति जु खप नगरपालिका वडा नं. ८ महेश्वरी च्वंगु दुबेङ्केगु फल्चाय् पोल्हँ चिथाय् असोज १४ गते भायो स्वयो दिल् । खप नगरपालिकाया बजेटं दाडः च्वंगु उगु फल्चाय् स्थानीय जनतां जनश्रमदान याडः च्वंगु खः ।



किपा ग्राफीपनिगु वार्षिकोत्सव

खवप नगरपालिकाया प्रमुख सुनिल प्रजापति जुया मू पाहाँलय् किपाग्राफी भक्तपुरया खुकगु वार्षिकोत्सव ज्याइवः या उलेज्या असोज १६ गते छगू समारोहलय् याड दल ।

ज्या इवःसं नगर प्रमुख प्रजापति जुं न्हाड वानय् तांगु सम्पदा ल्यंकः म्वाकः तयगु थी थी काल खण्डय् कःगु किपा तयसं तहांगु भूमिका म्हेतिगु खाँ ब्याकसे किपा धायगु छगू इतिहास व समाजया छपा न्हयकं खः धायोदिल ।



पुलांगु व भ्नीगु मौलिक किपां खवपया इतिहास ब्वनय्ता व थुइकेता तस्कं ग्वाहाली यागु खाँ ब्याकसे पुलां पुलांगु किपात मुडः अभिलेखीकरण याय् मःगुलि बः बियो दल ।

नगर प्रमुख प्रजापति जुं पुलांगु किपात स्वय दयो हे थौं स्वयो गुडुदा हौं या खवपया लायकुली च्वंगु फसी देगः (शिलु महाद्यो) भ्नीगु थःगु हे मौलिक शैली दानय् फयो च्वंगु खाँ ब्याकसे उकिया देव पाखय् (पूर्वापाखय्) या गुथि संस्थानया छँ नं भ्नीगु थःगु हे मौलिक शैली दानय्गु कुतः जुयो च्वंगु खाँ ब्याकः दल ।

ज्याइवःसं किपाग्राफी खवपया सल्लाहकार नपां भक्तपुर साकोसया नायो भाजु बलराम प्रजापति जुं विदेशय् वानिपुं ल्यासे ल्याम्होपिन्ता नेपः देशय् हे ज्या बियता थी थी लाहातय् ज्या दैगु थःगु तुतिखय् थः हे दानय् फैगु सीप मूलक तालिमत न्ह्याकय् मःगुलि बः बियो दिसे न्हँगु पुस्ता समाजता हज्याकय्गु भाला कुबिडपुं जुयमः धायोदिल ।

किपा ग्राफी भक्तपुरया नायो भाजु अच्युत प्रजापति जुं खवपया कला व संस्कृति म्वाकः तयगु मतिं किपाग्राफी निस्वांगु खाँ ब्याकसे ब्वनय्कुथिया तगिलय् निसें हे फोटोग्राफीया कक्षात चाय्के मःगु खाँ ब्याकः दल ।

वरिष्ठ किपामि जगदीश तिवारी जुं किपामिपिसं खवपदेता हलिमय ब्याक म्हासिइका पिबवयो वयो च्वंगु खाँ ब्याकसे स्थानीय निकायं अमिता ध्वाःसा बियमः धायोदिल ।

ज्या इवःसं किपाग्राफी खवपया न्वकु भाजु पद्म सुन्दर शाक्य जुं सुभाय् देछायो द्यगु खःसा किपामि रबिता किसी, छ्याञ्जे बालकृष्ण प्रजापति व किरण सुवाल जु पिसं नं थः थः गु बिचः प्वंकः द्यगु खः ।

ज्या इवः सं नगर प्रमुख प्रजापति जुं बरिष्ठ किपामि नपां सिनेमाटोग्राफी केदार प्रसाद बनेपाली जू याता दोसल्ला डय्कः हानेज्या याडः द्यगु खः सा वयकलं किपाग्राफी खवपया ग्वसालय जूगु खवपया नवदुर्गा प्याखं नपां स्वापु दःगु किपा २०७८ या धिं धिं बल्लाखय् तस्क. तः लापुं हिम्हा व न्हाप, ल्यू व ल्यूयां ल्यू लाकय् फः पुं तः लापुं किपामि पिन्ता सिरपा, हना पौ व मतिनाया चिं लः ल्हाड ब्यूगु खः । अथेहे किपाग्राफी खवपय्या पद्म सुन्दर शाक्यया नायोसुई न्हँगु कार्यसमिति निस्वानय् ज्या नं क्वचःगु खः ।

छात्रवृत्ति इडः बिल

खवप नगरपालिकां शैक्षिक शत्र २०७८/७९ खय् हिंछगू तगियाय् ब्वनामिपिन्ता छात्रवृत्तिं ब्वनय्ता असोज १४ गते छात्रवृत्ति इड बिल । खवप नगरपालिकाया प्रमुख नपां छात्रवृत्ति छनोट समितिया नायो सुनिल प्रजापति जुं खवप नगरपालिका दुनयँ न्ह्याक च्वंगु हिंछगू व हिंन्यगू तगिं चाय्क तःगु संस्थागत ब्वनय् कुथि छात्रवृत्ति वितरण कार्यविधि २०७४ काथं शैक्षिक शत्र २०७८/७९ स छात्रवृत्तिखय् ल्ययो कः पुं ब्वनामिपिन्ता छगू समारोहसं छात्रवृत्ति छनोट सिफारिस पत्रः लःल्हाड बिल ।



कृषि अनुदान तःमि पिनिगु जालय् प्वः चिकगु नं भ्रष्टाचार हे खः

श्वेत भैरव बचत व ऋण सहकारी संस्था लि.या हिप्यकगू वार्षिक साधारण सभा खप नगरपालिकाया प्रमुख सुनिल प्रजापति जुं असोज १६ गते उलेज्या याड दिल् ।



ज्या इवःसं वयकलं प्रदेश सरकारं ब्यूगु अनुदान तःमि पिन्ता ल्ययो-ल्ययो इड ब्यूगु ट्रपं बियो दिसे धान्थेपुं किसानतय्ता अनुदान मब्यूगु छगू काथंया भ्रष्टाचार हे खः धायोदिल् ।

जनताया ग्वाहालीं दय्कगू अक्सिजन प्लान्टया निंतिं सहकारी संस्थाया पला तस्कं चवछाय बहगु ज्या देश व जनतां सदां लुमांकः च्वनिगु खाँ ब्याकसे सहकारी संस्थां वाचनालय, साफूकुथि क्लबत चाय्केगुलि बिचः याय्मः धायोदिल् ।

दुजः पिनिगु ब्यक्तित्व विकास नपां आर्थिक विकासया लागिं थी थी तालिम न्ह्याकय्मः गुलि बः बियो दिसे प्रमुख प्रजापति जुं सभ्य व सुसंस्कृत समाज दय्केगुलि संस्थां बिचः याय्मः धायोदिल् ।

धेबा मदयो च्वय थ्यंकः आखः ब्वनय् मखाना धाय म्वाय्कः हे खप नगरपालिकां म्हुवचा ब्याजं शैक्षिक ऋण बियो च्वंगु खाँ नं ब्याक दिल् ।

वडा नं. ८ या वडाध्यक्ष महेन्द्र खायमलीं स्थानीय न्हूंगु पुस्ताया ल्यासे-ल्याम्होपुं, ब्वनामिपुं, दुर्ब्यसनय् फसय् जुयो च्वंगु तस्कं चिन्ताया खाँ खः धायोदिल् । समाजय् अपराधिक गतिविधित अप्वयो वाड च्वंगुलिं थजगु ज्याखय् मजुइकेता फुक्कसिनं बिचः याडः थःथःगु परिवारय् नं थथे जूयो च्वंगु दः मरु स्वयमः धायोदिल् ।

भक्तपुर जिल्ला बचत व ऋण सहकारी संस्थाया काजी बहादुर पञ्च प्रदेश सरकारं बहुमुखी सहकारी संस्थाता नियमन यायमःगु सुभावा बियो दिल् ।

संस्थाया नायो रामप्रसाद खायमलीया सभानायोलय् जूगु उगु ज्या इवःसं संस्थाया सल्लाहकार नातिभाई ह्योम्बा, कृष्ण प्रसाद कोजू, जितेन्द्र खायमली, सत्यनारायण सुवाल पिसं नं न्वचु तयो द्यूगु खः ।

Tiime Series Analysis using Eviews विषय गोष्ठी

खप नगरपालिकाया प्रमुख सुनिल प्रजापति जुं खप कलेजया ग्वसालय व विश्वविद्यालय अनुदान आयोग नपांया मंकः कुलतय् Tiime Series Analysis using Eviews विषयसं जूगु डान्ह्या कार्यशाला गोष्ठी या मंगलबार उलेज्या याड दिसे अनुसन्धानता हःनय् तयो ज्या साडः च्वंगु देत मेपुं स्वयो हःनय लागु खाँ काड दिल् ।

विज्ञान व प्रविधिखय् अपलं लगानी याय् फः सा जक देश विकासया पूर्वाधार सम्भव दैगु खाँ ब्याकसे वयकलं राज्यं शिक्षा, विज्ञान व प्राविधिकता उलि वास्ता मयागु ट्रपं बियो दिल् ।

सरकारं प्रविधिक व अनुसन्धानया लागाय् लगानी अप्वयकः थुगु लागता प्रोत्साहन याय मःगुलि बः बियो दिसे नगरपालिका पाखं खप विश्व विद्यालय चाय्कः दांकः बांलागु मेडिकल शिक्षा बियगु नगरपालिकाया उद्देश्य दःगु खाँ नं ब्याक दिल् ।

खपया कलेज व ब्वनय्कुथिता अनुसन्धानया केन्द्र काथं विकास याकेगु उद्देश्य दःगु खाँ काडः दिसे वयकलं विकास निर्माणया ज्याखय् विदेशी तय्के बः कायो च्वनय् मज्यूगु व थःकय् दःगु ज्ञान, सीपता छ्यलः हछ्याय्ता अनुसन्धानं बांलागु



ज्यायाडगु खाँ काड दिल् ।

ज्या इवःसं खप कलेजया प्राचार्य रुपक जोशी जुं कलेजं दायें दायें पतिकं थी थी विषयसं अनुसन्धानया लागाय् कार्यशाला गोष्ठीत ग्वसः ग्वयो च्वंगु खाँ ब्याकसे थजगु ज्या इवःखं शिक्षकपिनिगु मन क्वसाडगु व मन ह्वय्कः ज्या सानय्ता ग्वाहाली जुडगु खाँ काड दिल् ।

ज्या इवःसं खप कलेज विभागीय प्रमुख सुनिल सुवालं नं न्वचु तयो द्यूगु खः सा ज्याइवःसं प्रमुख प्रजापति जुं कलेजया प्राचार्य रुपक जोशी जुयाता तालिमया सामग्रीत लः ल्हाडद्यूगु खः ।

स्काउटपिन्के समाजसेवी भावना द्यमः

असोज १८

खप नगरपालिकाया प्रमुख सुनिल प्रजापतिया मू पाहाँलय् खप नगरपालिका, नगर शिक्षा शाखाया ग्वसालय २०७६ पौष २४ गते निसैं २९ गते तक क्वचःगु ४५१ गू स्काउट बीटीसी व ३३६ गू स्काउट पीटीसी तालिम क्वचःगु ज्या इवः खप इञ्जिनियरिङ्ग कलेजया हल्य जूगु खः ।



ज्या इवःसं न्वचु तयो दिसे मू पाहाँ प्रजापति जुं स्काउट साहसिक तालिम खः धायोदिसे स्काउट तयके समाजसेवी भावना द्यमःगु खाँ ब्याकसे सामाजिक ज्या इवः खय ग्वाहालीया काथं ज्या सानय मः धायो दिल ।

खप नगरपालिकां स्थानीय पाठ्यक्रमय् स्काउटता दुथ्याकः नगरदुनयया ९२ गू ब्वनयकुथि ब्वंकः वयो च्वंगु खाँ ब्याकसें समाजता सांस्कृतिक राजनैतिक व उथिंगयंक माथांकः हछ्यायता स्काउटया लाहा दैगु खाँ नं वयकलं काड दिल ।

खप नगरपालिकां सामुदायिक व संस्थागत ब्वनयकुथिता उथिंगयंक हछ्यायगु क्तः याडः च्वंगु खाँ ब्याकसें वयकलं छगू छगू ब्वनय कुथि स्काउट तालिम न्ह्याकः समाजता बुद्धिजीवीकरण

यायता मः काथं पला न्ह्याकः च्वङागु खाँ नं काडः दिल ।

ज्या इवःसं खप नगरपालिकाया उप-प्रमुख रजनी जोशीजुं खप देता शिक्षित, सुसंस्कृत, सभ्य व सुरक्षित नपां अनुशासितथाय् द्यकेता स्काउटपिसं म्हितय मःगु ज्या खाँया खाँ काडः दिसे स्काउटं जीवनोपयोगी शिक्षा बिङ्गु खाँ काडः दिल ।

खप नगरपालिकां न्यायिक समिति पाखं याडः च्वंगु ज्या इवः त काडः दिसे वयकलं नगर दुनयँ अपराधी ज्यात अप्वयो वयो च्वंगु ल्याचा नं पिब्वयो दिल । खप नगरपालिका व स्काउटया मंकः कुतलय् न्हूगु पुस्ताता भिंगु लाँपु क्यडः समाजता बांलाकय फौगु खाँ नं काड दिल ।

ज्या इवःसं खप नगरपालिका वडा नं. ७ या वडाध्यक्ष उकेश कवां जुं स्काउटया मू उद्देश्य जनताया सेवा जुयमःगु व छम्हा छम्हा स्काउटरत समाजया मभिं मछिंगु ज्यायाय् विरुद्धय दानय मः धायो दिल ।

खप नगरपालिकाया प्रमुख प्रशासकीय अधिकृत रामलाल श्रेष्ठ जुं स्काउटं न्हपा-न्हपा नं विपद ब्यवस्थापन व सांस्कृतिक लागाय् च्वज्याकयता च्वछाय् बहगु ज्या याडः वयो च्वंगु खाँ ब्याकसे अनुशासन व इमान्दारिता ब्यक्तिया धात्थेगु म्हासिइका खः धायोदिल ।

खप नगरपालिका शिक्षा शाखा प्रमुख कृष्ण प्रसाद कर्माचार्य जू या सभानायोलय् जूगु ज्या इवःसं खप नगरपालिका वडा नं. ९ या वडाध्यक्ष रविन्द्र ज्याख्वः, नेपाल स्काउटया पूर्व राष्ट्रिय छ्याञ्जे राम गोपाल कर्माचार्य व नेपाल स्काउट नगर तदर्थ समितिया कजि कृष्ण सुन्दर प्रजापति जुं नं न्वचु तयो द्यगु खः ।

ज्या इवःसं नगर प्रमुख प्रजापति जुं ४५१ गू स्काउट विटिसी व ३३६ गू स्काउट पीटीसी तालिमय् ब्वति कः पिन्ता दसिपौ लः लहाडः दिल ।

मोहनी बलय् तलेजुई मः काथं पुजाजक याइगु

असोज १९

खप नगरपालिका प्रमुख सुनिल प्रजापतिया नायोसुई जिल्ला प्रशासन कार्यालय, महानगरीय प्रहरी परिसर, नेपाली सेना, सशस्त्र प्रहरी खपया प्रतिनिधि, गुथि संस्थान खपया प्रमुख व तलेजुया पुजारीपुं नपां च्वडः हः नय वयो च्वंगु मोहनी नखाया लसताय जुइगु उगु इलय्या भक्तपुर लाय्कु दुनयया तलेजुया दुनयँ जुइगु थी थी जात्रा नपां स्वापु दःपुं लिसैं बैठक जुल ।

बैठकसं नगरप्रमुख प्रजापति जुं कोभिडया संक्रमण म्हवँ

जुयो वांसां जोखिम मुक्त मज्जनिगुलिं थजगु इलय् थुगुसीया मोहनी नखा सुरक्षित काथं डायकेमः धायो दिल । दशमिबलय् शान्ति-सुरक्षा बिय तस्कं थाकुइगु लिं पुजा आज्ञा मदिकसें हुलमुल मयासें सामाजिक दुरी काथं ताः ता पाकः च्वडः, व स्वास्थ्य सुरक्षा मापदण्ड पालना याडः डायकेता इनाप याय्गु खाँ ब्याकः दिल ।

बैठकं विश्वब्यापी महामारी काथं डाडः पुडः वयो च्वंगु कोभिड १९ ल्वचं म्हवँ जुयो वांसां उगु ल्वचं थिइगु धः सा त्वः मतनिगु इलय याता स्वयो मः काथं जक डायकेगु याडः खपदेया



तलेजु दुनयें जुडगु फुक्क पुजाखय् बली मब्यूसें स्वास्थ्य सुरक्षा मापदण्ड पालना याडः पुजारीपिनि पाखं नित्य पूजा जक याय्गु ब्यवस्था मिलय् याडः हुलमुल मयासैं सामाजिक दुरीता बीचः याडः पुजा याय्ता सर्वसाधारण जनताता आह्वान याय्गु खाँ क्वःछित ।

बैठकसं नलास्वनय्गु दिनं निसैं विजया दशमि खुनुं तक नगरया थी थी शक्तिपिथय् नपां धार्मिक स्थलय् जुडगु मेला, पुजा व नवरातया मेलासं स्वास्थ्य सुरक्षा मापदण्ड काथं चवडः हुलमुल

न्हयध्गुगु स्वप पौ. बःछि पौ(पाक्षिक)

मयाय्ता व सामाजिक दुरी पालना याडः कोभिड १९ भ्वल्वचं मथिडक मपुंकः थः नं म्वाडः कतता नं म्वाकः सकल नगरबासीपिन्ता आह्वान याय्गु खाँ क्वः छिता । नपां उगू बैठकं मोहनीनखाया लसताय जुडगु फुक्क पुजाआजा-मेला, धार्मिक व सांस्कृतिक ज्या इवः त जुडगु फुक्क थासय् शान्ति सुरक्षा नपां मेमेगु मः मः गु ब्यवस्था मिलय् याय्ता जिल्ला प्रशासन, प्रहरी, वडा कार्यालय व स्थानीय टीम क्लवपुं नपां मंकः कृतः याय्गु खाँ नं क्वः छित ।

बैठकसं ख्वपया रुद्रादेवी शर्मा जुं चाडपर्वखय् कोभिड डाडः पुडः वानिगु जोखिम अपः दैगुलिं स्थानीय तह, जिप्रका, प्रहरी प्रशासन व थी थी संघ संस्थाया मंकः कुतलं मोहनी शान्तिपूर्ण व सुरक्षित यायमः धाय माल ।

बैठकय् ख्वप नगरपालिका वडा नं ७ या वडाध्यक्ष उकेश कवां, वडा नं. ३ या वडाध्यक्ष राजकृष्ण गोरा, वडा नं ५ या वडाध्यक्ष प्रेम गोपाल कर्मचार्य, प्रहरी उपरीक्षक शिव कुमार श्रेष्ठ, गुथि संस्थान कार्यालयया प्रमुख आनन्द प्रसाद कर्माचार्य, तलेजुया पुजारी पुं पद्म लोचन कर्माचार्य व सिद्धि वीर कर्माचार्य जू पिसं थुगुसीया मोहनी नखा सामान्य काथं जक डाय्कः कोभिड भ्वल्वचं थः ता नं मथिडकः कततानं मपुंकः डाय्के मः धायोदिल ।

साफू कुथिया विषय स्वापु दःपुंनपां छलफल

असोज १९

ख्वप नगरपालिकाया प्रमुख सुनिल प्रजापति जू या नायोसुड ख्वप नगर दुनय् चाय्कः च्वंगु सार्वजनिक साफू कुथि वाचनालयया प्रतिनिधिपुं नपां या बैठक जुल । उगु बैठकसं (पुस्तकालय) साफू कुथि व वाचनालयया प्रतिनिधिपिसं थः थः गु थाय्या साफू कुथि व वाचनालयया अवस्थाया खाँ काडः दिसे ब्यवस्थित काथं मदिकक चाय्कः हज्याक यंकय्गु विषय (छलफल) खँलाबला जुल ।

बैठकसं न्वचु तयो दिसे नगरप्रमुख प्रजापति जुं समाजया छम्हा-छम्हा मनूतयसं साफू कुथिया महत्व थुडकय् फःसा दे हज्याकय्ता गवाहली जुडगु खाँ काडः दिल । साफूकुथिया महत्व विद्यार्थी जीवनय् अपलं दैगु खाँ ब्याकसे वयकलं ल्यासे-ल्याम्होपिन्ता मभिंगु लॉपुड मडाय्केता साफू कुथि तः क्यंकः तयो ब्वनय्गु विकास याडः यंकय्मः धायो दिल । ख्वप नगरपालिका नगर दुनयें न्ह्याकः च्वंगु साफू कुथि तय्गु स्तरोन्नति व गवाहलीया लागिं आनाया स्थिति व सम्भावनात थुडकः च्वडागु खाँ नं काडः दिल ।

ख्वप नगरपालिकाया उप-प्रमुख रजनी जोशी जुं साफू कुथि सभ्य व सुसंस्कृत समाज दय्केता बांलापुं मनूत ब्वलांकय्गु थाय जूगुलि थुकिता च्व जाय्क यंकेंगु व अभ् बांलाक यंकय्गुली

नगरपालिकां कृतः याडः च्वंगु खाँ ब्याक दिल ।

बैठकं हलिमय डांकः पुडः वयो च्वंगु कोरोना भ्वल्वय (कोभिड १९) ल्वचं संक्रमितपुं म्हवें जुयो वाडः च्वंसां जात्रा-पर्व नखा-चखा बलय् थुगु ल्वचं अपलं डाडः पुडः वानय् फःगुलिं अभ्नुं ग्यापुय फःगुलिं साफूकुथि वाचनालय, टीम, क्लव नपां स्थानीय सामाजिक संघ संस्थात अभ् हज्याडः थुगु ल्वचं मपुंकः पाडः तय्ता तस्कं हज्याडः ज्या सानय् मःगु खाँयाता मनन याडः फुक्क वाचनालय साफूकुथि व टीम क्लवया पदाधिकारीपुं स्वास्थ्य





व्हयखगुगु स्वप पौ. बःखि पौ(पाक्षिक)

सुरक्षा मापदण्ड मानय याडः, भौतिक दुरी कायम याडः हुलमूल याकय् मवियगु ज्याखय् सक्रिय जुयः मःगु खॉ क्वः छित ।

नपां हःनय् वयो च्वंगु मोहनी नखा २०७८ नपां स्वाःड च्वंगु शक्तिपिठय् जात्रा, खॅमे ब्वाकिगु जात्रा, नवदुर्गाया जात्रा, तलेजु जात्रा, ब्रम्हायणी जात्रा थजगु जात्रात शान्तिपूर्ण व सुरक्षित काथं क्वचाय्केता साफूकुथि व बाचनालयया दुजः पुं सुचुकुचु, जात्रा ब्यवस्थापन, स्वास्थ्य सामग्री इडबियगु नपां समाजया मभिंगु ज्यात पानय्ता प्रचार -प्रसार याडः मःगु थासय् ग्वाहालीमि काथं स्वापु दःगु वडा व थासय् च्वडः ज्या सानय्गु खॉ नं क्वः छित ।

उगु बैठकय् भःपुं प्रतिनिधिपिसं सार्वजनिक साफूकुथिया थाय् सानय् स्वय मछिंगु, अनुसन्धान नपां स्वापु दःगु साफूत ब्यवस्था याडः प्रविधिमैत्री याय् मःगु, साफूकुथि इन्टरनेटया ब्यवस्था याय मःगु साहित्यिक साफू नपां पाठ्यपुस्तक तनं तय मःगु, कासा,

अन्तरक्रिया थजगु अतिरिक्त क्रियाकलापत न्ह्याकःम्हा नगरपालिकां मः काथंया भौतिक व आर्थिक ग्वाहाली याय मःगु थजगु सुभावं नं बियो दिल ।

बैठकं ख्वप नगरदुनयया सार्वजनिक साफूकुथि बांलाक यंकय्ता छुः याःसा जिई धाय्गु सुभावं ब्यय्ता ख्वप नगरपालिकापाखं चाय् कः तःगु जनज्योति पुस्तकालयया पुस्तकालय अधिकृत भूपाल मूलया कजिलय् डाम्हासिया ज्यासना पुत्रः निस्वांगु दः ।

बैठकय् प्रगति पुस्तकालय सहिद राजकुमार पुस्तकालय, मणिसुन्दर पुस्तकालय, लेनिन पुस्तकालय, भी पासा साफूकुथि, सहिद निर्मल पुष्परत्न वाचनालय, भीगु वाचनालय, बौद्धिक विकास मण्डल पुस्तकालय निर्मल पुष्प वाचनालय, न्यातपोल कर्नर पुस्तकालय, जागरण पुस्तकालय, मंगलाछँ युवा क्लव नपां थी थी साफू कुथिया प्रतिनिधिपुं भायो द्यगु खः ।

बागीश्वरी 'मोहनीया भिन्तुना' ज्या इवः

असोज २०

बागीश्वरी कलेज ब्यवस्थापन समितिया नायो नपां ख्वप नगरपालिकाया प्रमुख सुनिल प्रजापति जुं बैदेशिक लगानिं भीता स्यंकिगु खॉ ब्याकसे विदेशीया तुतिखय् दाडः न्ह्याक च्वंगु छुं नं संस्थात ताः मतुइगु खॉ काड दिल ।

ज्या इवःसं कलेज ब्यवस्थापन समितिया नायो नपां ख्वप नगरपालिकाया प्रमुख सुनिल प्रजापति जुं बैदेशिक लगानिं भीता स्यंकिगु खॉ ब्याकसे विदेशी तुतिखय् दाडः न्ह्याक च्वंगु छुं नं संस्थात ताः मतुइगु खॉ काडः दिल ।

सरकारं शिक्षा लागाय् याडः च्वंगु लगानी तस्कं हे म्हवँ जूगु, मगागु खॉ ब्याकसे वयकलं प्राध्यापक व कर्मचारीपिसं धेबा जक कमे याय्गु मतिं व थःजक भिं जुइगु ब्यक्तिगत स्वार्थ प्याहाँ वयो संस्थाया भिं याय्गु व संस्थाता हज्याकय्गु ज्या सानय् मः धायोदिल ।



ख्वपया ब्वनामिपिन्ता थाना गुणास्तरीय शिक्षा काय्ता बांलागु वातावरण वागीश्वरी मा.वि. व कलेजं बियोः च्वंगु खॉ खय् बः याडः दिसे नगर प्रमुख प्रजापति जुं ख्वपया म्हासिइका व गौरव ल्यंकः तय्ता स्थानीय जनताया तहांगु लाहा दैगु खॉ नं ब्याक दिल ।

स्नात्तकोतर तगिंया ब्वनामिपिसं कतया थेसिस खुयो कायो पास जुयगु तस्कं मज्यगु बिचः ज्वडः वैपु नं खानय् दयो वगु खॉ खय् कुखिडः दिसे वयकलं हःनय् वयो च्वंगु मोहनी नखाया बिदा भिंगु ज्याखय् छ्यलय्ता न्हँ न्हँगु साफु त ब्वडः सिर्जनशील ज्याखय् छ्यलय्ता सल्लाह बियो दिल ।

वागीश्वरी मा.वि. व कलेजया कजि भाजु ज्ञानसागर प्रजापति जुं मोहनी नखाया बिदाता रचनात्मक ढंगं छ्यलय् मःगुलि बः बियो दिसे वागीश्वरीं विदेशी संघ-संस्थाया ग्वाहाली मकःसिं वयो च्वंगु खॉ नं ब्याक दिल ।

वागीश्वरी कलेजया प्राचार्य धनकुमार श्रेष्ठ जुं मंकः कुतलं संस्था हज्याकय् अः पुइगु खॉ ब्याकसे वागीश्वरी कलेजं अनुसन्धानया लागिं जक नीखुगूलाख बजेट छखय् लिइकः वयो च्वंगु व थी थी विषयया कार्यशाला गोष्ठी नं यायां वयो च्वंगु खॉ नं काडः दिल ।

वागीश्वरी मा.वि. या प्र.अः कृष्ण प्रसाद धन्छां सुभाय् दे छायो द्यगु उगु ज्या इवःसं सहायक प्र.अ. उकेश सुवाल, विज्ञान संकायया भानुभक्त हुमागाईं, वागीश्वरी मा.वि. टेक्स ज्या इवःया कजि दिनेश प्रधान, वागीश्वरी कलेज ब्यवस्थापन संकायया कजि बब्लु कुमार रावत, गोहेन्द्रप्रसाद दाहाल, कृष्णप्रसाद कर्माचार्य पिसं भिन्तुना नपां थः थः गु बिचः प्वंकः द्यगु खः ।

खपया रानीपुखुया उत्तरपाखय्या ध्वाका व फल्चा निस्वान

खप नगरपालिकाया प्रमुख सुनिल प्रजापतिजुं खप नगरपालिका वडा नं. १ सल्लाघारी च्वंगु खपया ऐतिहासिक रानीपुखुया उत्तरपूर्वया ध्वाका व फल्चा दानय्ता निस्वाड दिल ।



ज्या भ्वसं नगरप्रमुख प्रजापति जुं सन् १९८६ सं जुजु जगज्योति मल्लया पालाय् दयकगु खपया रानीपुखं खप देया शोभा अजनं दय्कगु नपां खप देता सुन्दर नगरकाथं हज्याकय्ता नगरपालिका मदिक न्ह्याडः च्वंगु खाँ ब्याक दिल ।

खपदेया सांस्कृतिक नपां पुरातात्विक सम्पदायाता बांलाकः आर्थिक स्रोत दैगु काथं हिलय् फँगु खाँ ब्याकसे वयकलं खप नगरपालिकां थःगु तुतिखय् दाडःथानाया सम्पदा ल्हवनय्-कानय् याडागु खाँ काडः दिल ।

वयकलं कला संस्कृति म्वाकःतय्ता ह्दाय तयो खप नगरपालिकां तःभ्वखाचां स्यंकेगु १०८ गू स्वयो अपः सम्पदा ल्हवनय्-कानय् व दानय्गु ज्या क्वचाय धुंकगु नपां ऐतिहासिक रानीपुखु ल्हवनय्-कानय्याय् धुंकः इतिहास लिपुलः स्वयगु ज्या जूगु नं खाँ ब्याक दिल ।

ताःहाकगु इतिहास कः घाडः च्वंगु थुगु पुखु भ्नीगु थःगु हे मौलिक पहलं दय्कागु खाँ ब्याकसे नगरप्रमुख प्रजापति जुं खपदेता कला संस्कृतिं जःगु जक मखुसैं तस्कं बांलागु सुचुपिचुगु नगर दय्केगु उद्देश्य दःगु खाँ ब्याक दिल ।

खप नगरपालिका वडा नं. १ या वडाध्यक्ष श्यामकृष्ण खत्री जुं रानीपुखु ल्हवनय्गु ज्या क्वचायकः गुलिफता उलि मथां सर्वसाधारणता नं दुकाय्गु खाँ ब्याकसे पुखु सिथय् चाकलीं वाउँक तयो तय्गु स्वमा-सिमा पिडःकिबाय् दय्केगु कुतःयाडः च्वडागु खाँ नं. ब्याक दिल ।

इतिहासविद् प्रा.डा पुरुषोत्तम लोचन श्रेष्ठजुं सम्पदा ल्हवनय् कानय् ज्याखय् थःगु हे मौलिक पहलं दानय्गु ज्याखय् खप नगरपालिका दकलय् हःनय्च्वडः ज्या साडःच्वंगु खाँ ब्याकसे खपया रानीपुखु ल्हवनय्गु ज्या क्वचःसेलिं थःतातस्कं गौरव जूगु लय्ता खाँ प्वकः दिल ।

निस्वानय्गु ज्या भ्वःसं उपभोक्ता समितिया नायो पूण्यराम गारु, दांभारी सुमित्रा घौंजु नपां स्थानीय कृष्ण गारुं नं न्वचु तयो द्यगु खः ।

सिर्जना नगरे आधारभूत स्वास्थ्य सेवा केन्द्र

खप नगरपालिकाया प्रमुख सुनिल प्रजापतिजुं खप नगरपालिका वडा नं. १ सिर्जना नगरय् दानय् धुंकगु आधारभूत स्वास्थ्य सेवा केन्द्रया भवन उलेज्या याडः दिल ।

ज्या भ्वः सं वयकलं जनताया ग्वाहालीं दांगु स्वास्थ्य केन्द्रं जनताया सेवा याडगु विश्वास प्वकसे संस्थाया भौतिक पूर्वाधार नपां जनशक्ति व्यवस्थापन खय् नं नगरपालिकां बिच याडगु खाँ ब्याक दिल । वयकलं उपभोक्ता समितिपाखं चायकगु स्वास्थ्यसेवा केन्द्रया भवनय् छुं हे मगा-मचः दैमखु ज्वी धायोदिसे जनताया थःगु धाय्गु भावना नं थुकी दैगु खाँ नं काड दिल ।

खप नगरपालिकापाखं चाय्कःतःगु खप अस्पताल कोभिड युनिटं ४५५ म्हा कोभिड सङ्क्रमितपिनिगु सेवा याय् धुंकगु खाँ ब्याकसे वयकलं खप अस्पतालय् अक्सिजन प्लान्ट दय्केगु भ्वलय्

स्थानीय जनता व थी थी संघ संस्थापाखं व्यगु आर्थिक व नैतिक ग्वाहाली जनताया सेवा याय्ता थप उत्साह जायो वगु खाँ काडः दिल ।

प्रमुख प्रजापति जुं तःदा हाँ निसे नाखं दाडः, दुबानय् लाडः वयोच्वंगु सिर्जना नगर नःपलि लागाय् सुरक्षित याय्ता नगरपालिकां ज्यासाडः वयोच्वंगु खाँ ब्याकसे खप नगरपालिकां मदांसे मगागु ज्या याता ह्दाय तयो विकास निर्माणया ज्या साडः वयो च्वंगु खाँ ब्याकसे वयकलं विदेशी तय्के ग्वाहाली फ्वडः गुब्ले भ्नी थःगु तुतिखय् दाडः ज्या सानय् मफैगु खाँ नपां खप नगरपालिका दुनय्या (पतिजगगा) छ्यःत मेपिन्ता त्यलकाय्के मब्यूसैं ल्यंकः म्वाकः तयगुलि ज्यासाडः वयो च्वंगु खाँ नं ब्याकदिल ।

खपया सल्लाघारी च्वंगु १०८ पि जगगाखय् खप विश्व



विद्यालय चायकेगु उद्देश्य नगरपालिकां तःतं वयो च्वंगु नपां नगरपालिका दुनयया न्हँ न्हँगु बस्तीता आधुनिक व सुविधां जःगु सहरकाथं विश्वास याडः यंकय्गु योजना दःगु खाँ काडः दिल ।

ख्वप नगरपालिका वडा नं. १ या वडाध्यक्ष श्यामकृष्ण खत्री जुं वडां १६ गू नगर स्तरीय व च्यागू वडास्तरीय योजनात क्वचाय्के धुंकगु खाँ काडः दिसे अः दानय् धुंकगु नवनिर्मित स्वास्थ्य संस्थाया भवन नं मथां हे स्वास्थ्य सेवा विद्गु खाँ नं ब्याक दिल ।

ख्वपया रानी पुखु थ्यं मथ्यें ज्या क्वचाय् हे धुंकल धः सां ज्यू धायोदिसे वयकलं मथां हे सर्वसाधारण पिनगु लागिं नं चाय्केगु कुतः जुयो च्वंगु खाँ नं ब्याकदिल ।

ला पसलय अनुगमन

ख्वप नगरपालिका अनुगमन समितिया कजि राजकृष्ण गोरया न्ह्यलुवाय् ब्रम्हायणी व तुमचो दुगुरे आवास क्षेत्रय् च्वंगु बधशालाय् व ला पसलय अनुगमन यात । अनुगमनय् अपलं पसलय मापदण्ड पालना मयागु व दर्ता नं मयागु खानय् दत ।

अनुगमनया भ्वलय ब्रम्हायणी होलसेल मिट सप, बधस्थल दर्ता मयागु आनासं दर्ता याकः सुचुकुचु खय् ध्यान बियता व आंगलय, बायँ सुचुकुचु अःपुकयता जिडकः मार्वलसां, टायलसां तयमःगु, मैँ स्याइथाय् मेपुं मैँनं मखांकः खुयमःगु, तराजु नविकरण मयागुलिं यायमःगु, ला स्यूगुनाः सफा जुयालिं खुसी छ्वय्ता, तुडगु एप्रोन छ्यलय्ता व ज्या सानिपिन्ता बुट व पञ्जाया व्यवस्था याय्ता निर्देशन बिल ।

अथेहे ब्रम्हायणी मिटसप दर्ता मज्गुलिं दर्ता याकः पसलय फ्रिजय बासीगु ला मतय्ता, सुचुकुचु याय्ता, एप्रोन सफागु व तुडगु छ्यलय्ता, मूल्य सुची तय्ता आंगः बांलाकः हुयछिंकः मार्वल व टायल तिकय्ता, ला ताडगु व ज्याभः व भाला कुला सफा याडः तय्ता निर्देशन बिल ।

न्हयछगुगु स्वप पौ, बःछि पौ(पाक्षिक)

ख्वप नगरपालिका वडा नं. १ या पार्टी इन्चार्ज लक्ष्मी नारायण खत्री जुं ख्वप नगरपालिकां शिक्षा व स्वास्थ्यता ह्दाय तयो ज्या साडः वयो च्वंगु खाँ काडः दिसें नेपाल मजदुर किसान पार्टी दे डांकः एमसीसीया विरुद्धय थी थी ज्या भ्वःत न्ह्याकः वयो च्वंगु खाँ नं काडः दिल ।

वहे लसताय्या ज्या भ्वः सं नगर प्रमुख प्रजापति जुं भवन निर्माण उपभोक्ता समितिया पदाधिकारीजूपिन्ता खादा क्वखाय्क हानेज्या याडः दिल । अथेहे सिर्जना नगरया स्थानीय लवरीया थपलिया जुं नगर प्रमुख प्रजापति जु याता नवनिर्मित स्वास्थ्य संस्थालागि अक्सिजन कन्सनट्रेटर ग्वाहाली काथं लःल्हाडः दिल ।

ज्याभ्वःया सभानकीं नपां उपभोक्ता समितिया नकीं सम्भना प्रेमीजुं २०७७ जेठ २१ गते निस्वांगु भवनय् ख्वप नगरपालिका व स्थानीय जनताया ग्वाहाली दःगु खाँ ब्याक दिल । अथेहे भवन निर्माण उपभोक्ता समितिया दां भारी शान्ता घिमिरे जुं भवन निर्माणया ल्या चा पिब्वयो दिल ।

ज्याभ्वः सं वडा नं. १ या वडाया दुजः नपां अनुगमन समितिया दुजः सूर्यप्रसाद श्रेष्ठ, ख्वप अस्पतालया रत्नसुन्दर लासिव, नपलि सिर्जना सेवा समाजया नायो रामहरि पोखरेल, नपलि सिर्जना नगर टोल सुधार समितिया नायो बिकुलाल बासु, नपलि सिर्जना सेवा समाज महिला उप-समितिया सभापति इन्दिरा नेपाल पिसं नं थःथःगु न्वचु तयो द्यूगु खः ।

अथेहे महिमा कोल्ड स्टोर दर्ता नविकरण मयागुलिं नविकरण याकः तराजु नं नविकरण मयागुलिं नविकरण याय्ता निर्देशन बिल ।

अथेहे श्री कमल विनायक मिट सपय् सुचुकुचुखय् ध्यान बियता, सफा व तुडगु एप्रोन छ्यलय्ता, मूल्य सूचीतय्ता, आंगः बांलाक हुयछिंक, मार्वल व टायल तय्ता, ला ताडगु चुपीत व भाला कुला सफा याडः तय्ता निर्देशन वियागु खाँ वडा निरिक्षक रामकृष्ण प्रजापतिं धायो दिल ।

अनुगमन पुचलय अनुगमन समितिया दुजः हरिराम सुवाल, रोशन मैयाँ सुवाल, ख्वप नगरपालिका श्यानिटेशनया न.नि.दिलपकुमार सुवाल, वनि राम कृष्ण प्रजापति, कर शाखाया अर्जुन खाइत्, पशु सेवा कार्यालयया पार्वती योजन, राष्ट्रिय उपभोक्ता मञ्चया लक्ष्मी भण्डारी, महानगरीय प्रहरी परिसरया प्रहरी सहायक निरिक्षक भगाउरप्रसाद हरिजन, व भक्तपुर घरेलु तथा साना उद्योग संघया लक्ष्मी प्रसाद कवां पु नं भायो द्यूगु खः ।

नेपः या गुप्त प्रतिवेदन विदेशय् थ्यंकपुं एनजि ओ/आइ एन जि ओ



नेपाल मजदुर किसान पार्टीया नायो भाजु नारायण मान बिजुक्छें (का.रोहित) जुं नेपः देशय् चाय्क च्वंगु गैर सरकारी व अन्तर्राष्ट्रिय गैर सरकारी (एनजि ओ/आइ एन जि ओ) संस्थां नेपः देया कानय् मज्युगु गुप्त खाँ त विदेशय् थ्यंकय्गु ज्या याडः च्वंगु द्रुपं बियो दिल ।

नायो भाजु बिजुक्छें देया सार्वभौमिकताखय् घः लाइगु देशघाती एमसीसी सम्भौता खारेज याय् मःगुली बः बियो दिसे एनजिओ, आइ एन जिओ तय्सं नेपःया शासक दलपिन्ता थः दखय् स्वकः अमिपाखं ज्या कायो च्वंगु खाँ काडदिल । वागीश्वरी कलेजया गवसालय व विश्व विद्यालय अनुदान आयोगया मंकः कुतलय 'क्वालिटेटिभ एण्ड क्वान्टिटे टिभ' विषयसं जुगु स्वन्ह्या कार्यशाला गोष्ठीया उलेज्या याडदिसे वयकलं विकसित देशं विकासया नामयँ भीगु नेपः देता बियो च्वंगु ग्वाहालीं दे कतया भरय् म्वाय् माय्केगु पाखय् घ्वाडः यंकः च्वंगु खाँ नं ब्याकदिल ।

उगु इवलय् वयकलं नेपः या सांसद बुद्धिजीवी पिन्ता नपां थःगु प्रभावय् लाकः एमसीसी नेपालं अनुमोदन याकय्ता थी थी जः

गवयो च्वंगु खाँ नं काड दिल ।

कलेज ब्यवस्थापन समितिया नायो नपां ख्वप नगरपालिकाया प्रमुख सुनिल प्रजापति जुं ख्वप नगरपालिका दुनयँ न्ह्याकः च्वंगु कलेजता अनुसन्धानया केन्द्र काथं निस्वानय्गु कुतः जुयो च्वंगु खाँ ब्याक दिल ।

वयकलं नं नेपालय् न्ह्याक वयो च्वंगु गैर सरकारी व अन्तर्राष्ट्रिय गैर सरकारी संस्था या ज्या इवःखं विकासया नामं च्यो-भ्वातिं याडः च्वंगु नपां देशता उपनिवेश याइगु संभावना अपलं दैःगु खाँ ब्याकसे मेपिनिगु लाहातं ज्या काय्गु धाय्गु भी कतया भरेम्वाय्क माय्किगु खाँ ब्याक दिल ।

वागीश्वरी मा.वि. या प्र.अः कृष्ण प्रसाद धन्छा जुं शिक्षण सिकाइया इवलय अनुसन्धानया महत्व बारे प्रष्ट यासे शिक्षक-कर्मचारीपिसं थःकय् दःगु ज्ञान इड ब्वनामिपिनि पाखं च्वजायकय् वियमः धायो दिल । ज्या इवःसं वागीश्वरी कलेजया प्राचार्य धन कुमार श्रेष्ठ जुं अनुसन्धानया महत्व थुइकः वगीश्वरी कलेजं थुगुसी नीखुगु लाख तका दां छखय् लिइकगु खाँ ब्याक दिल ।

भीगु नगर सफा नगर, सफाइ भीगु गौरव

भक्तपुर साकोसया उलेज्या

असोज २३

नेपाल मजदुर किसान पार्टीया केन्द्रीय दुजः नपां खप नगरपालिकाया प्रमुख सुनिल प्रजापति जुं भक्तपुर बचत तथा ऋण सहकारी संस्था लि. या नीप्यकगू साधारण सभाया उलेज्या याडः दिल ।

ज्या इवः सं प्रमुख प्रजापतिजुं सहकारी संस्थाया इमान्दारीता व न्हयकनय स्वयर्थे पारदर्शीतां जनताया विश्वास ल्यडः च्वनिगु खाँ ब्याकसे शिक्षा, स्वास्थ्य व ब्यापार बनय ज्यायगु नपां अपलं लागाय् अपलं अपः जनताया सेवा यायगु उद्देश्य सहकारी संस्था तयो हज्याय् धायोदिल ।

भक्तपुर साकोसं आदर निकेतन चाय्केगु कुतः याडः च्वंगु तस्कं च्वछाय् बहजगु ज्या खः धायोदिसे वयकलं खप नगरपालिकां नगरया माथां वांकः विकास याययगुली ध्यान तयो च्वंगु खाँ नं ब्याक दिल ।

वयकलं खप अस्पतालय् अक्सिजन प्लान्ट चाय्केता खपया जनतां लच्छीया दुनयँ खुगूकरोड तका स्वयो अपः दां आर्थिक ग्वाहाली याडः द्यगुलिं अजनं अपः जनताया सेवा यायगु मन वांगु खाँ ब्याकसे वैगु दिनय् नं जनताया साथ व ग्वाहाली कायो हे नगरपालिका हज्याइगु खाँ काडः दिल ।

विदेशी तयगु ग्वाहालीं भीगु देश विकास जुय हे मफैगु खाँ काडः दिसे वयकलं विदेशी तयके ध्याछ हे धेबा मकः सिं खप नगरपालिकां तः भवखाचां थुड ब्यगु सम्पदात ल्हवनय -कानय् व दानयगु ज्या जुयो च्वंगु, थुगु ज्या जनताया ग्वाहालीं हे याय् फःगु खाँ ब्याक दिल ।

एमसीसीया नामय आर्थिक ग्वाहालीया ज्याभः काथं छ्यलः सं.रा. अमेरिकां नेपः देता थःगु उपनिवेश दय्केगु जः याडःच्वंगु खाँ थुडकः सकल जनता छप्पा छधि जुयो ल्वाय मःगु खाँ ब्याकसे प्रमुख प्रजापति जुं शासक दलतयसं थः सरकारय् वानयता नेपः देता कतया उपनिवेशनं फयता तयार जुयो च्वंगु खाँ ध्वाथुडकः काडः दिल ।

खप नगरपालिका वडा नं. ९ या वडाध्यक्ष रविन्द्र ज्याख्व जुं भक्तपुर साकोसता अपलं जनतां विश्वास याडः च्वंगु या मू हुनि साकोसं जनताया भिंम्हा पासा थें याडः ब्यवहार यागुलिं खः भायो दिल ।

कोभिड महामारी नपां खप नगरपालिकां स्वास्थ्य क्षेत्रता



हदाय तयो खप अस्पताल चाय्क वयो च्वंगु खाँ ब्याकसे वडाध्यक्ष ज्याख्व जुं मथां हे भेन्टिलेटर व आइसीयु नपांया खप अस्पताल न्ह्याकयता नगरपालिकां ज्या साडःच्वंगु खाँ ब्याक दिल ।

भक्तपुर साकोसया नायो बलराम प्रजापति जुं ज्या साडः नैपुं ज्यापु ज्यामिवर्गपिन्ता आर्थिक व सामाजिक रुपं हज्याय फयकः बांलाक जीवन न्ह्याकय फयकेता ग्वाहाली यायगु संस्थाया उद्देश्य खः धायो दिसे वहे काथं संस्था हज्याडः च्वंगु खाँ ब्याक दिल ।

नेफस्कनया सञ्चालक समितिया दुजः मन्दरा मिश्र जुं राज्य सहकारी क्षेत्रता मःकाथं संरक्षण व ग्वाहाली याय मफगु याता कुंखिडः दिसे स्वीकृति मकसें चाय्कः तःगु बहुउद्देशीय सहकारी संस्था तयसं सोभापुं जनता तयता ठगय् याडः च्वंगुलि सतर्क याडः दिल । समुदायया लिधंसाय् न्ह्याडः च्वंगु सहकारी काथं भक्तपुर साकोसं म्हासिडका पिब्वयो वयो च्वंगु खाँ ब्याकसे वयकलं भक्तपुर साकोस जनताया आशा व भलोसा खः धायोदिल ।

ज्या इवःसं संस्थाया छ्याञ्जे लक्ष्मी प्रसाद कुसी जुं आ.व. २०७७/७८ या समितिया प्रगति प्रतिवेदन दांभारी राम प्रसाद प्रजापति जुं आ.व. २०७७/७८ या वित्तीय विवरण नपां २०७८/०७९ या याय् फैगु अनुमानित वार्षिक बजेट व लेखा सुपरीवेक्षण समितिया कजि कृष्ण सुन्दर प्रजापति जुं समितिया आ.व. ७७/७८ या प्रगति प्रतिवेदन न्ह्यब्वयो दिल ।

ज्या इवःसं भक्तपुर जिल्ला संघया दांभारी कान्छा भक्त घजु, सल्लाहकार रत्न प्रसाद प्रजापति, न्वकु निर्मल प्रजापति नेम्हा दुजपुं जगन्नाथ प्रजापति व रामेश्वरी कोजु पिसं संस्थाया पाखं जुयो च्वंगु ज्याइवः व उद्देश्य छु खः ? दक प्रस्ट याडः दिल ।

लोकेश्वर साकोसया साधारण सभा

असोज २३



प्वंक दिल ।

खप नगरपालिका वडा नं. २ या वडाध्यक्ष हरि प्रसाद बासुकला जुं खपया सहकारी संस्थातय्गु ज्या इवःत नियमन व अनुगमन इलय्-ब्यलय् याडः चवनय् मःगु खाँ ब्याकसे सहकारी संस्था उत्पादनमूलक लागाय् लाय छ्यलय्मः गुलि बः बियो दिल । देको-मिबा इतापाके जग्गा एकीकरणया मू उद्देश्य धाय्गु हे उगु थाय्ता ब्यवस्थित व सुविधा सम्पन्न दय्केगु खः धायोदिसे वडाध्यक्ष वासुकलां बुँथुव तय्गु नुगः खाँ न्यडः

नेपाल मजदुर किसान पार्टीया केन्द्रीय दुजः नपां खप नगरपालिकाया प्रमुख सुनिल प्रजापतिया मू पाहाँलय् खप नगरपालिका वडा नं. २ इटाछेँ च्वंगु लोकेश्वर बचत तथा ऋण सहकारी संस्था लि. या हिंष्यकगु साधारण सभा उलेज्या याडः दिसे सहकारी संस्थां ल्यासे-ल्याम्होपिन्ता लाहातय् ज्या दैगु तालिमत न्ह्याकय् फःसा अपुं थःगु तुतिखय् चुय फैंगु लि बिचः याय् मःगु प्रदेश सरकारं कःसि खेतीया लागिं बियो च्वंगु अनुदानया धेबा वास्तविक किसान तय्सं काय्मखांगुलिं कुं खिडदिसे उगु अनुदान धात्थेपुं किसान तय्गु लाहातय् लाय्मः धायो दिल ।

‘छगू सहकारी छगू सम्पदाय् सुचुकुचु ज्या इवः’ पाखं खपया सांस्कृतिक सम्पदाय् सुचुकुचु खय् सहकारी कःमि पिनिगुत्स्कं बांलाक ज्या साड् द्यगु खाँ ब्याकसे प्रमुख प्रजापति जुं नगरपालिकातापुलय् मःगु कर इलय् हे पुलय्ता व नक्सा व मापडण्ड काथं छेँ दानय्ता उत्साहित याड् दिल ।

खप अस्पतालय् दय्केगु अक्सिजन प्लान्टया लागिं खप नगरपालिका दुनयँ चाय्क तःगु सहकारी पाखं अपलं ग्वाहाली जूगुलिं गौरवान्वित जुयागु खाँ ब्याकसे वैगु दिनय् नं नगरपालिकाया ज्या इवःखय् थानाया संघ-संस्थाया साथ व ग्वाहाली दैगु विश्वास

टिप्लिटिड नक्सा मथां हे दय्कः पिताविय्गु कुतः जुयो च्वंगु खाँ काड् दिल ।

ज्या इवःसं न्हापाय्म्हा वडाध्यक्ष रविन्द्र खबुर्जा जुं देशघाती एमसीसी सम्भौता नेपःदेता भिं मयाइगुलिं सकल देशभक्त नेपःमि पुं छप्पा छधि जुयो विरोधया सः थ्वय्के मः धायो दिल ।

ज्या इवःया सभापति नपां संस्थाया नायो भाजु राजन जति जुं संस्थाया दुजः पिन्ता ब्यवसायिक आत्मनिर्भर व प्रविधि मैत्री दय्कः संस्था हज्याड संस्थां संख्यात्मक स्वयो गुणात्मक सेवा बियो वयो च्वंगु खाँ ब्याक दिल ।

ज्या इवःसं भक्तपुर जिल्ला बचत संघया सञ्चालक समितिया दुजः चण्डिका छुकां, संस्थाया न्वकु प्रनेश बाटी जुं सुभाय देछायो द्यगु खः सा प्रबन्धक प्रशान्त मानन्धर, संस्थापक नायो श्याम सुन्दर मातां व दुजः राजु छुकां नं न्वचु तयो द्यगु खः नपां संस्थाया दांभारी पुण्यराम स्वंगमिखां आर्थिक प्रगति प्रतिवेदन छयाञ्जे कृष्णराम तुकं बञ्जारं वार्षिक प्रगति प्रतिवेदन व लेखासुरीवेक्षण समितिया कजि लक्ष्मी भक्त दुवालं प्रगति प्रतिवेदन न्हयब्वयो द्यगु खः ।

ज्या इवःसं नगर प्रमुख प्रजापति जुं संस्थाया जेष्ठ दुजपुं डय्म्हासिता दोसल्ला डय्कः हनापौ नपां बियो हानय्ज्या याड् दिल ।

खप इञ्जिनियरिङ्ग कलेजय् भिन्तुना ज्या इवः

असोज २४

नेपाल मजदुर किसान पार्टीया नायो भाजु नारायणमान बिजुक्छेँ (का.रोहित) जु या मू पाहाँल्य् खप नगरपालिका पाखं न्ह्याक च्वंगु खप इञ्जिनियरिङ्ग कलेज व खप कलेज अफ इञ्जिनियरिङ्गया मंकः कुतलय् आइतबार मोहनी व स्वन्ति नखाया लसताय् शिक्षक पुं व कर्मचारीपिनि दशवी भिन्तुना काल बिलया ज्या इवः जुल ।

ज्या इवःसं न्वचु तयोदिसे नायो भाजु बिजुक्छेँ जुं राजनीतिसं मिसामस्तयसं म्हवँचां जक ब्वति कायो च्वंगुलिं समाज आर्थिक, सामाजिक व राजनीतिक रुपं लिपा लाडः च्वंगु खः धायोदिल ।

शासक दल पिसं जनताया चेतनास्तर काथं ज्या याय् मफगु लि सांसदपुं जनताया सेवा स्वयो राज्यया ढुकुटी क्वचाय्कः थःगु ढुकुती जाय्केता लि मलाक जुयो च्वंगु खाँ काड दिल् ।

नेपालय् प्रगतिशील सरकार निस्वानय्ता नेमकिपां ल्वाडः वयो च्वंगु खाँ काड दिसे वयकलं राजनीति याइपुं शासक दलपिसं थः ता जक लबः दइगु अवसरवादी नीति हछ्याडः ज्या दय्किगुलिं नागरिकपिसं राजनीतिता स्वइगु मिखा हे पाडः च्वंगु खाँ काड दिल् ।

राजनीतिक पार्टीया नेता व कार्यकर्तातयसं थःगु ब्यक्तिगत स्वार्थ त्वः त देया स्वार्थता हछ्याडः ज्या सांगु जूसा राजनीतिख्य् जनतां अपलं विश्वास यायां यंकिगु खाँ ब्याकसे वयकलं खप नगरपालिकां सम्पदा ल्हवनय् कानय् व दानय्गु ज्याख्य् कायो च्वंगु उपलब्धी सकलसिया लागिं डाल काय बहज्गु धायो दिसे विदेशी ग्वाहालीं दयकगु स्वनिगःया सम्पदा पुनः निर्माण व विकास निर्माणया ज्या इवः खं भ्नीगु देया सार्वभौमिकताय् घः लाकं लाकं वगु खः धायो दिल् ।

कलेज ब्यवस्थापन समितिया नायो भाजु नपां खप नगरपालिकाया प्रमुख सुनिल प्रजापति जुं हःनय् वयो च्वंगु मोहनी व स्वन्तिया लसताय भिन्तुना देछायो दिसे नखाचखा व संस्कृति

प्रगतिशील पहलं डाय्केग सल्लाह बियो दिल् ।

देया राजनीति बांलासा फुक्क लागाय् माथांक विकास जुइगु खाँ ब्याकसे सरकारं शिक्षा व अनुसन्धानय् म्हवचा जक लगानी यागुलिं हे थौं देया गति थय् जुयो च्वंगु खाँ ब्याक दिल् ।

देशघाती एमसीसी सम्भौताया विरुद्ध बौद्धिक समूदायं सशक्त ढंगं विरोधया सः श्वय्केमः धायोदिसे वयकलं एमसीसी सम्भौता चाकुं पाड तःगु विष थें खः दक धायो दिल् ।



कलेज ब्यवस्थापन समितिया न्वक् रजनी जोशी जु इञ्जिनियर व प्राविधिक कर्मचारीपुं समाज नपां भेलय् पुड ज्या सानय् मःगुलि बः बियो दिसे खप नगरपालिकां शिक्षा, स्वास्थ्य लागाता अपलं बः बियो हदाय् तयो ज्या साड वयो च्वंगुलि थौं मेगु स्थानीय तह स्वयो खप नगरपालिकां च्वछाय् बहगु ज्या याय् फःगु खः धायो ।

ज्या इवःसं खप इञ्जिनियरिङ्ग कलेजया प्राचार्य सुजन माक व खप कलेज अफ इञ्जिनियरिङ्गया प्राचार्य सुनिल दुवालं सञ्चालक समिति क्वः छिगु खाँ व कलेजयागु ज्या इवः त ब्वयो दिल् ।

मू पाहाँ विजुक्छेँ जुं कलेजया ग्वसालय जूगु थी थी कासाख्य् तः लापुं कासामिपिन्ता मेडल व दसिपौ लः ल्हाडः दिल् ।



न्हयध्गूगु खप पौ. बःछि पौ(पाक्षिक)

मोहनीया इलय् स्यल्लागु (सृजनशील) ज्या याडः मानय् याय्मः

असोज २४

मोहनीया इलय् सृजनशील ज्याखय् छ्यलः थः, गु लुमन्ति (संस्मरण) या खँत चवसु छुं साहित्यवा साफूत चवयो छ्यलय्मः धायो दिसे खप नगरपालिकाया प्रमुख सुनिल प्रजापति जुं मोहनी व स्वन्ति नखा गथे याडः सभ्य, सुसंस्कृत व सृजनशील काथं हछ्याय्गु धाय्गु खायँ बिचः याय्मः धायो दिल ।

नगर प्रमुख प्रजापति जू या मू पाहाँलय् खप नगरपालिका वडा नं. १ या गवसालय् मोहनी, स्वन्ति नेसं ११४२ (न्हँदँ) व छठ पर्वया लसताय आइतबार जूगु भिन्तुना कालबिल ज्या इवःसं वयकलं देया थौं कन्हैया राजनैतिक परिप्रेक्ष्यता लिफ्यड काड दिसे देया राजनीतिक विषय सकल सिनं बिचः याय्मः धायोदिल ।

वयकलं अः शासन सत्ताय् चवड च्वंपिसं विदेशी दबावय् देशघाती सम्भौता यागुलिं देया सार्वभौमिकता ल्यंक तय्ता सकल देशभक्त नागरिकपिसं विरोध याय्मः धायो दिल ।

खप नगरपालिकां सर्त नपांया छुं नं विदेशी सहयोगता मकः सँ जनताया ग्वाहालीं डातापोल्हँ, भैलदेगः नपांया अपलं सम्पदात ल्हवनय् कानय् व दानय्गु ज्या क्वचाय् धुंगु खँ कुलदिसे

देशता बौद्धिक दरिद्रतां मथिइक तय्ता सरकारं देशय् ब्वलापुं जनशक्ति त देशय् हे छ्यलय् मगु वयकलं काड दिल ।

ज्या इवःया सभापति नपां वडा नं. १ या वडाध्यक्ष श्याम कृष्ण खत्री जुं वडा नं. १ खय् जुयो च्वंगु विकासया ज्या इवः काड दिसे सम्पदा म्वाकः तय्गुलिं हज्याडः प्यंगः ऐतिहासिक पुखु ल्हवडः ल्यंक तय्गु ज्या नपां थी थी लाहातय् ज्या दैगु तालिमत बियो वयो च्वंगु खँ ब्याक दिल ।

ज्या इवःसं खप नगरपालिका वडा नं. १ या समाजसेवी लक्ष्मी नारायण राजलवतं खप नगरपालिकां शिक्षा, स्वास्थ्य सुचुकुचु व सम्पदा म्वाक तय्ता च्वजःगु ज्या याड वगु खँ काड दिलसा वासु मा.वि. या प्राचार्य अम्बिका न्याईच्याइँ जुं पार्टीया घोषणा-पत्रया लिधंसाय् खप नगरपालिकाया जनप्रतिनिधिपिसं अपलं दुःख सियो शिक्षा, स्वास्थ्य, कासा नपां मिसातय्ता नं समता मूलक विकासय् हछ्याडः यंकय्गु कुतः याडः च्वंगु खँ काड दिल । ज्या इवःसं वडाया दुजः सुर्यप्रसाद श्रेष्ठ, गंगालक्ष्मी बमनु व वडासचिव दामोदर लिबिं नं न्वचु तयो द्युगु खः ।

मोहनी नखा भिंगु ज्यायाडः डाय्के

असोज २५

नेपाल मजदुर किसान पार्टीया नायो भाजु नारायण मान बिजुक्छँ जुया मू पाहाँलय् खप नगरपालिकापाखं गवसः गवगु मोहनी नखाया भिन्तुना देछाय्गु ज्या इवः सोमबार क्वचाल ।

ज्या इवःसं वयकलं नखाबलय् अपलं फोहर याइगुलिं सुचुकुचु याइपुं मजदुरपिसं बिचः याडः ज्या सानय् मःगु व जनप्रतिनिधिपुं व कर्मचारीपुं न्ह्याबलें हज्याडः च्वनय्मःगु नपां नखाचखा व जात्राबलय् कोभिड ल्वय डाडः पुड वानय् फःगुलिं सचेतनामूलक ज्याइवः न्ह्याकय्ता सल्लाह बियो दिल ।

कर्मचारीतन्त्र स्थायी सरकारकाथं प्रतिकात्मक जक जूगुलिं अमिता अनियमितता याय्गु छुट मरुगु खँ ब्याकसे अमिसं ब्यक्तिगत स्वयो सामाजिक विषयता महत्व बियो ज्या सानय् मः धायो दिसे नायो भाजु बिजुक्छँ जुं विकास निर्माण व नक्सा पास ज्याखय् अनियमितता मयाकय्ता प्राविधिक पिनिगु तः हांगु लाहा दैगुलिं वयक पुं सचेत जुयमःगु कर्मचारीपुं शिष्ट, नम्र, विनयशील व नैतिकवान जुयमः धायोदिल ।

न्हँगु पुस्ताता ब्वनय् लाइकगु अध्ययन सामग्री पिकाय्ता बुद्धिजीवी पुं हज्यायमःगु नपां देया नमूना नगरपालिका काथं

म्हासिइका पिब्वयो च्वंगु खप नगरपालिकां थुगु गरिमा ल्यंकः तय्ता अपलं बः याडः च्वनय् मः धायो दिसे वयकलं अपलं अपः हूलमूल व भीड मुडः तहांगु पार्टी धाय्वं अमिगु बिचः व सिद्धान्तनपां सहमत जुय मफैगु बिचः प्वंक दिसे शासक दलया महितामतिं याडः थौं तक खप विश्व विद्यालय स्वीकृति मब्यगु खँ काड दिल ।

नायो बिजुक्छँ जुं खप नगरपालिकां नगरप्रहरी ब्यवस्था





व्हयखगुगु खप पौ, बःखि पौ(पाक्षिक)

याड नगरता थप ब्यवस्थित व सुरक्षित याडः आवासक्षेत्रे तः तः ग्वगु अपलं इयातुगु भारी ज्वड वैगु गाडी दुकाय् मज्यगु नपां जनताता नक्सा काथं छँ दांकय्ता उत्साहित याय मः धायो दिल ।

अथेहे खप नगरपालिकाया प्रमुख सुनिल प्रजापति जुं कर्मचारीपुं सामान्य नागरिक स्वयो चव्य यायपुं जुइगुलिं अपुं सामान्य नागरिक स्वयो नखा चखाया इलय् सिर्जनशील व रचनात्मक ज्याइवल्य दुतिन संस्कृतिक नपां द्रहँवइगु विकृति व विसंगतिया खाँ काडः जनताता सचेत याय् मः धायो दिल ।

जलाखाला दे भारतं भीता आर्थिक रुपं थामकाय्ता अनेक जः याडः च्वंगु खाँ ब्याकसे परमादेशं दयकगु सरकार दे व जनताया

सेवा मयाइगु खाँ ब्याकसे खप नगरपालिकाया जनप्रतिनिधि पिसं जनताया निःस्वार्थ सेवा याडः च्वंगु नपां शिक्षा, स्वास्थ्य, सुचुकुचु व सम्पदा म्वाक तयगुलि डाल काय् बहगु ज्या याडः च्वंगु खाँ कुलदिल ।

उप-प्रमुख रजनी जोशी कला, संस्कृति व भाय् मरुसा भीगु म्हासीका पू मवानिगु खाँ ब्याकसे स्थानीय पाठ्यक्रम नपां न्यायिक समितियागु ज्या ब्वयो दिल ।

अथेहे प्रमुख प्रशासकीय अधिकृत रामलाल श्रेष्ठ जुं कर्मचारीपिसं निःस्वार्थ कर्तव्य पालनं नगरपालिकाया इज्जत थाजाइगुली मोहनीया इलय् थःथगु लागया ज्या जिम्मेवारी काथं याय्ता निर्देशन याडः दिल । ज्या इवःसं वडा नं. ७ या उक्वेश कवां नं न्वचु तयो द्यगु खः ।

थी थी थासय् मोहनीया भिन्तुना ज्या इवः



नेपाल नगरपालिका कर्मचारी एशोसियसनया ग्वसालय् गौतम लासिवाया सभा नायोल्य भिन्तुना काल बिल नपां मार्गनिर्देशन ज्या इवः नेमकिपाया छ्याञ्जे नपां संघीय प्रेम सुवालया मू पाहाँ लय् खप नगरपालिकाया प्रमुख सुनिल प्रजापतिया विशेष पाहाँलय् नगरपालिकाया सभाहलय् जुल । ज्या इवःसं उप-प्रमुख रजनी जोशी, प्रमुख प्रशासकीय अधिकृत रामलाल श्रेष्ठ जु पिसं नं न्वचु तयो द्यगु खः ।

अथेहे प्याब्सन खपया ग्वसालय मूपाहाँ खप नगरपालिकाया प्रमुख सुनिल प्रजापतिया मू पाहाँलय् भिन्तुना काल बिल व मैत्रीपूर्ण फुटसल कासा जूगु ज्या इवःसं भिन्तुना देछासे खप नगरपालिकां थी थी कासाया प्रशिक्षण बियो वयो च्वंगु, खपय् माथांका विकास याय्गु काथं ज्या साडः च्वंगु, राजनीति बाँलासा दे विकास व समृद्ध जुइगु खाँ ब्याक दिल । उगु ज्या इवःसं प्याब्सन भक्तपुर नगरया नायो रमेश चन्द्र श्रेष्ठ नपां थी थी पदाधिकारीपिसं न्वचु तयो द्यगु खः ।

अथेहे खप नगरपालिकाया प्रमुख सुनिल प्रजापतिया मू पाहाँलय् नगरपालिका श्यानिटेशन शाखाया कर्मचारी पिनि दशवी भिन्तुना काल बिल ज्या इवःसं प्रमुख प्रजापति जुं सुचुकुचु ज्या तस्कं च्वछाय बहगु ज्या खः धायो दिसे कर्मचारी तय्के शिष्टता

अनुशासन व इमान्दारिता दय्मः गु खाँ ब्याकसे नखा बलय् अपलं फोहर याइगु खाँयाता बिचः याडः जनप्रतिनिधिपुं व कर्मचारीपिनिगु मंकः कुतलय् नगरता सुचुकुचुगु नगर काथं म्हासिइका पिब्वय्गु ज्या याय्मः धायोदिल ।

ज्या इवःसं वडा नं. ९ या वडाध्यक्ष रविन्द्र ज्याख्वः, वडा नं. ५ या प्रेम गोपाल कर्माचार्य, श्यानिटेशन शाखा प्रमुख दिलिप सुवाल व वडानिरीक्षक रमेश तुइतुई नं न्वचु तयो द्यगु खः ।

अथेहे खप नगरपालिका वडा नं. ८ य ग्वसालय सुनिल प्रजापतिया मू पाहाँलय् जूगु मोहनीया भिन्तुना काल बिल ज्या इवसं प्रमुख प्रजापति जुं मोहनीया इलय् अपलं खर्च याय्गु बानी त्वः तय् मःगु खाँ ब्याकसे खप नगरपालिकां समाजता सांस्कृतिक व राजनीतिक रुपं हछ्याय्गु ज्या साडः, च्वंगु फुर्सदया ई प्रगतिशील काथं छ्यलयता सुभाब बियो दिल ।

उगु ज्या इवः सं वडा नं. ८ या वडाध्यक्ष महेन्द्र खायमली, नेमकिपा वडा नं. ८ या इन्चार्ज कृष्ण प्रसाद कोजु, वडाया नेम्हा दुजः पुं पञ्चमाया दुवाल व शिव प्रसाद वाला व वडासचिव राजेश दिष्टी नं न्वचु तयो द्यगु खः ।

नेपाल नगरपालिका कर्मचारी एशोसियसन पाखें मोहनीया
मिन्तुना काल-बिल ज्या इव: २०७८ असोज २४ गते)



ख्वप नगरपालिकाया स्यानिटेशन शाखापाखें मोहनीया
मिन्तुना ज्याइव: २०७८ असोज २६ गते)



ख्वप इञ्जिनियरिङ कलेजय अभिमुखीकरण ज्याइवः

(२०७८ असोज १५ गते)



दमक नगरपालिकाया उप प्रमुख अधिकारी जु ख्वप नगरपालिकाय्

(२०७८ असोज १४ गते)

